



特別
18
3414
8





門 八 18
號 3414
卷 8

早稻田大学
25.6.22
康 泰

御訂全金詩增補中州集卷二十二



金元好問原本



諸家

朱葭州自牧

二十首

自牧字好謙棣州厭次人皇統中南選宋
端卿榜登科大定初以同知晉寧軍事卒

全金詩卷二十二

官有詩云寒天展碧供飛鳥落日留紅與
斷霞又云水禽孤影白霜果半腮紅海氣
升孤月巖姿起暝烟山雪尋崖斷林烟逐
樹低燈殘星在壁霜重水漫衾句法之工
類如此

病起書事

牢落衰年病轉侵醫編藥裹廢閒吟臥銷白日塵
凝屨起對青銅雪滿簪霜後癡蠅看老態天邊倦

鳥識歸心維摩不出文殊去門巷蕭條翠蘚深

晨起趨省

鄰雞一鳴僕再呼三星已在東南隅霜風遶屋伺
我出布衾尚欲留須臾才疎性懶真勉強饑寒見
迫誰能逋山靈笑我真有謂能使我庾如陵乎

自鄜州歸至新市鎮時方渡險喜見桑野

閭山自天降爲田洛水自瀑舒爲淵山川險盡鞍
馬穩昔居檠棹今乘船三年官業無毫髮萬里裝

囊更蕭瑟歸來何以謝鄉閭細說艱難爲土物

自鄜州罷任歸宿澠池道中有虎爲暴

峭山之阿澠之澣行路蕭條正艱阻日落山空澗
水哀市門靜閉防饑虎前年張茅殺餉婦今歲食
驢斷行旅我來萬里逐一官安可不戒爲汝脯晝
持弓矢夜枕戈靜匿兒童防笑語白額將軍莫笑
人世無劉琨當畏汝

趨鄜州過湖城縣武帝望思臺在焉

寒骨千年飲恨埋餘哀空寄望思臺縱令曲沃精
魂見寧與商山羽翼來趙魯典刑何足正周公畫
像可憐開忍心本自窮兵起巫蠱焉能作禍胎

晉寧感興

莫將官况說葭蘆一味蕭條稱鄙夫老圃不禁蔬
代肉樵丁還喜炆連廚兒音半已漸秦晉鄉信無
因接魯洙三見秋風落庭樹年年歸意負尊鱸

年節嵐州席上贈同知王子直中散

別時風雪暗龍津一夢經年復見君去國光陰雖
易得夾河形勢且平分心如征馬常嘶代身伴秋
鴻却渡汾此日一罇難惜醉新年風景舊知聞

送鄜州節判任元老罷任東歸二首

長途冰雪歲崢嶸客裏那堪送客行萬里歸心應
接浙一罇別酒且班荆春生汶水庭闈近人去雕
陰幕府輕欲仗征鴻寄消息地寒不肯過邊城
都騎駸駸指汶陽關門應識棄繻郎莫寒烟浪歸

期阻細雨簷花飲興長束帶暫爲彭澤令曳裾休
忤漢梁王邊城情味君應會爲說無繆與故鄉

小雨不出寧海司理廳

吏散庭空鎖碧苔冷官門戶幾曾開疎疎細雨槐
花落寂寂虛堂燕子來多病始知窮有鬼獨賢方
覺仕無媒故園拋擲奔馳外剛道江山未放回

過渾源留別田仲祥同知節使

金臺前夢杳無蹤一阻雲山莫計重雙鯉附書常

不達兩萍浮海偶相逢
燕南落日車分轍
代北春風酒滿鍾
明日去留牽世務
燈前談笑且從容

劉仲規挽辭

富貴康強九十春
公歸無憾我傷神
人間秀氣還嵩岱
夢裏行年屬巳辰
名姓空留耆舊傳
衣冠不見老成人
淒涼通德門前路
無復青蒲裏畫輪

訪山寺僧

踏破蒼苔叩竹扃
晚晴夜院有餘清
幡腰落日紅

千巖簷際遙岑翠
一橫種秫公田聊
卒歲栽蓮僧社擬
投名從今興熟頻
來往未信齋鐘午
後鳴

謝吳堡知寨安巨濟贈紙百幅

百幅溪牋遠見羞
故人佳餉若爲酬
幸將晚節收魚網
未得良工起鳳樓
柿葉學書差足慰
芸香辟蠹會須求
揮毫不見雲煙落
愚賈操金愧暗投

清河道中莫歸

緩轡溪邊喜乍晴
夕陽流水浸孤城
川平佛塔層

層見浪穩商舟尾尾行十里烟霞隨野步兩崖禾
黍撼秋聲雨暘雖有豐年兆久客都無地可耕

晚泊濟陽

江北秋陰一半晴晚涼留與客襟清水邊畫角孤
城莫雲底殘陽遠樹明旅鴈爲誰來有信斷蓬如
我去無程寥寥天地誰知己村酒悠然只獨傾

冬日擬江樓晚望

萬里長空淡落暉歸鴉數盡下樓遲山如駭浪高

低湧天似寒灰黯淡垂紫塞西橫連統萬黃河東
下接汾睢此邦形勢雄今古只與羈人百不宜

對雪

寂寂袁安舍柴門雀可羅青氈無舊物黃竹有新
歌罷飲瓢仍棄供吟筆旋呵殷勤埽荒逕尚憶子
猷過

郊行

緩轡尋春水一涯最憐朝雨浥輕沙小溪煙重偏

宜柳平野雲垂不礙花青眼步兵元好酒黑頭江
令未還家興長不覺歸來晚過盡城頭陣陣鴉

和郭仲榮郡城秋望

城高野濶思何窮人在西風一笛中樓影不搖溪
水淨春聲相答莫山空海天引望能供碧霜樹禁
秋更倚紅回首客魂招不得尊鱸歸興滿江東

孫內翰九鼎一首

九鼎字國鎮忻州定襄人天會六年經義
第一人在太學時遊金明作詩云片片桃
花逐水流東風吹上木蘭舟隔溪紅粉休
相認年少孫郎不姓劉弟九疇億俱有時
名三人同榜登科吳彥高贈國鎮詩云孫
郎有重名談笑取公卿清廟瑟三歎齋房
芝九莖其爲名流所稱道如此吾州文派

先生指授之功爲多年八十餘卒

甄莊三藏真身

三藏來中土時其師授記謂當逢甄而住歿後三百年見

夢於白氏
出地中

生自龜茲國來從大業年緣甄駐飛錫夢白出重泉鐵石亦有毀筋骸何尚全應知待彌勒萬劫庇山川

附三朝北盟會編建炎三年金人試舉人於蔚州遼人應詞賦兩河人應經義張孝

純充主文忻州進士孫九鼎爲魁

附金圖經金自侵遼之後所在以科舉取士遂有瀋州榜平州榜真定榜至天會十年海內小安下詔如契丹開闢制限以歲三月鄉府省三試鄉中日鄉薦府中日府解省中日及第程文分兩科日詩賦日經義上一場殿試則詩賦加論經義加試策榜與魁各分焉是年趙洞爲詞賦第一人

孫九鼎爲經義第一人並補承議郎第二
第三人承奉德郎餘不限甲次盡補承事
郎科舉由是而定

附松漠紀聞金人科舉先於諸州分縣赴
試詩賦者兼論作一日經義者兼論策作
三日號爲鄉試悉以本縣令爲試官預試
之士唯雜犯者黜榜首曰鄉元亦曰解元
次年春分三路類試自河以北至女真皆

就燕關西及河東就雲中河以南就汴謂
之府試試詩賦論時務策經義則試五道
三策一論一經義凡二人取一榜首曰府
元至秋盡集諸路舉人於燕名曰會試凡
六人取一榜首曰勅頭亦曰狀元分三甲
曰上甲中甲下甲勅頭補承德郎視中朝
之承議上甲皆賜緋七年卽至奉直大夫
謂之正郎第二第三人八年或九年中甲

金詩卷二十一
九
十二年下甲十三年不以所居官高卑皆
遷大夫中下甲服綠例賜銀帶府試差官
取旨尚書省降劄知舉一人同知二人又
有彌封謄錄監門之類試闈用四柱揭綵
其上目日至公樓主文登之以觀試或有
私者停官不叙仍決沙袋親戚不回避尤
重書法凡作字有點畫偏旁微誤者皆曰
雜犯先是考校畢知舉卽唱名近歲上中

下甲雜取十名納之國中下翰林院重考
實欲私取權貴也考校時不合格者白榜
其名試院欲開餘人方知中選後又置御
試已會試中選者皆當至其國都不復試
文只以會試榜殿廷唱第而已士人頗以
爲苦多不願往則就燕徑官之御試之制
遂絕又有明經明法童子科然不擢用止
於簿尉明經至於爲直省官事宰執持筆

硯童子科止有趙憲甫位至三品

附中興紀事本末金試舉人於蔚州初太原帥張孝純因城陷降金見粘罕不肯拜執歸中京至是以孝純主文柄是時遼人皆用詞賦兩河人皆用經義而孫九鼎者爲第一忻州人也九鼎政和閒遊太學與洪皓同舍在舍十年始登第皓在北方屢見之

劉修撰或 二一首

或字公茂安陽人天眷二年經義第二人自號香巖居士歷京兆總幕終於翰林修撰

秋雨得雲字

一室蕭然半掩門簷牙懸溜喜初聞棲鴉不動寒
隈樹過鴈無聲冷貼雲歷耳半隨風浙瀝舞堦仍
帶葉繽紛隔籬爲問東臯叟麩麥前春定十分

似雨非晴意思深宿醒牽牽泥重衾苦憐燕子寒
相並生怕梨花晚不禁薄薄簾幃欺欲透悠悠歌
管壓來沉南園北里狂無數唯有芳菲識此心

春陰

趙內翰可

三首

補二首

可字獻之高平人貞元二年進士仕至翰
林直學士風流有文采詩樂府皆傳於世
號玉峯散人集子述字勉叔承安二年登
科賦雪云奇貨可居天種玉太平有象麥
連雲屏山故人外傳說勉叔詩章字畫皆
有父風性落魄嗜酒卒以樂死俶儻奇男
子也

來遠驛雪夕

使高麗
時作

江上東風冷不禁晚雲翻手弄晴陰春來天氣不
全好夜久雪花如許深煖老正思燕地玉辟寒誰
有魏臺金空齋寂寞青綾被學得東山擁鼻吟

雲興館曉起

雙旌晚泊雲興館對面高峯絕可人一夜山雲飛
作雪要誇千樹玉璘珣

江路聞松風

雪裏雲山玉作屏松風入耳細泠泠朝來醉著江
亭酒却被髯龍喚得醒

自白雲上石甕至明仙與黑道人飲

白雲下明仙巖路縈九折僧居未離人西崦頗孤
絕萬株倚空青雙壁似天闕幽懷愜泉石高行在
麴蘖道人唱山歌擊竹爲之節翩然兩朱袖雅鄭
輒閒發殘陽逼歸鞍悵與清境別今宵晉溪夢蕭
灑掛林樾

金言卷二十一
三
謁先主廟

天下英雄操與君老奸豈是一流人乘時不作池中物得士能令鼎足均故里柔桑曾羽葆荒祠古木尚龍鱗天教典午亡吳魏雅志嗚呼竟不伸

劉西巖汲

十一首

補二首

汲字伯深南山翁之子天德三年進士釋褐慶州軍事判官入翰林爲供奉自號西巖老人有西巖集傳於家屏山爲作序云人心不同如面其心之聲發而爲言言中理謂之文文而有節謂之詩然則詩者文之變也豈有定體哉故三百篇什無定章章無定句句無定字字無定音大小長短

險易輕重惟意所適雖役夫室妾悲憤感
激之語與聖賢相雜而無愧亦各言其志
也已矣何後世議論之不公耶齊梁以降
病以聲律類俳優然沈宋而下裁其句讀
又俚俗之甚者自謂靈均以來此秘未睹
此可笑者一也李義山喜用僻事下奇字
晚唐人多効之號西崑體殊無典雅渾厚
之氣反詈杜少陵爲村夫子此可笑者二

也黃魯直天資峭拔擺出翰墨畦逕以俗
爲雅以故爲新不犯正位如參禪著末後
句爲具眼江西諸君子翕然推重別爲一
派高者雕鐫尖刻下者模影剽竄公言韓
退之以文爲詩如教坊雷大使舞又云學
退之不至卽一白樂天耳此可笑者三也
嗟乎此說旣行天下寧復有詩耶比讀劉
西巖詩質而不野清而不寒簡而有理澹

而有味蓋學樂天而酷似之觀其爲人必
傲世而自重者頗喜浮屠遠於性理之說
凡一篇一詠必有深意能道退居之樂皆
詩人之自得不爲後世論議所奪真豪傑
之士也

題西巖

人愛名與利我愛水與山人樂紛而競我樂靜而
閒所以西巖地千古無人看雖看亦不愛雖賞亦

不歡欣然會予心卜築於其間有石極峭岬有泉
極清寒流觴與祓禊終日堪盤桓此樂爲我設信
哉居之安

卜築西巖最可人青山爲屋水爲隣身將隱矣文
何用人不知之味更真自古交游少同志到頭聲
利不關身清泉便當如澆酒澆盡胸中累劫塵

平涼道中

青山炯無塵塵滿行人衣行人望青山咫尺不得

歸吾歸不作難世故苦相違何當臨溪水一洗從
前非

南園步月

雲橫樹外山樹映山巔月微風拂寒枝疎光散清
樾幽歡難相遇此景安可忽從來山水心不爲塵
埃沒

不如意

朝亦不如意莫亦不如意今日只如此來日復何
異一懽強欲謀百憂已先至乃知塵網苦動輒心
萬計高軒與華冕儻來亦如寄規規必欲求愈勞
終不遂善哉榮啓期自寬以遣累

慶州回過盤嶺宿義園

隨馬雨不急催人日欲晡山從林杪出路到水邊
無拘縛嗟微宦崎嶇走畏途村家應最樂雞酒夜
相呼

到家

三載塵勞慮翻然盡一除園林未搖落庭菊正扶
疎遶屋看新樹開箱檢舊書依然故山色瀟灑入
吾廬

高陽道中

杏花開過野桃紅榆柳中間一徑通禽鳥不呼村
塢靜滿川烟雨淡濛濛

家僮報西巖栽植滋茂喜而成詠

孤雲出岫本無心何用微名挂士林近日故園消

息好西巖花木已成陰

留別四弟

對牀喜清夜罇酒話平生自是今宵雨於人却有
情

酒中作

樹暗春將老酒闌人欲歸徘徊風雪夜花絮一簾
飛

西巖歌

西巖逸人以天爲衢兮地爲席茵青山爲家兮流水爲之朋饑食芝兮渴飲泉又何必有肉如林兮有酒如澗世閒清境端爲吾輩設吾徒豈爲禮法繩少文援琴衆山響太白舉杯明月清波澄人間行路是處處多炎蒸如何水前山後六月赤脚踏層冰

題蒲縣下庫村

汲嘗
令此

古柳長楸倚翠微水光嵐氣襲人衣清閒歲月無

多事事簡何妨倒載歸

附趙秉文西巖歌跋南山翁子伯深西巖

歌置之古人集中誰能辨之所謂不拘禮法非如晉之狂士公未及五紀致政臨終不亂蓋有道者公又有詩云身將隱矣文何用人不知之味更真尤可諷也

劉內翰瞻 三首

瞻字巖老亳州人天德三年南榜登科大
定初召爲史館編修卒官党承旨世傑
鄜著作元與魏內翰飛卿皆嘗從之學巖老
自號櫻寧居士有集行於世作詩工於野
逸如廚香炊豆角井臭落椿花之類爲多

春郊

桑芽粒粒破春青小葉迎風未展成
寒食歸寧紅

袖女外家紙上看蠶生

無極道中

銀河淡淡瀉秋光
缺月梢梢挂晚涼
馬上西風吹
夢斷隔林烟火路
蒼茫

所見

傾欹石片插漣漪
上有蕭蕭楊柳枝
藻荇半浮苔
半濕浣沙人去不多時

郝內翰俛

二十二首

俛字子玉太原人正隆二年進士仕至河
東北路轉運使子居簡字仲寬進士不第
有詩名太原平陽閒居中字仲純樞密院
令史出身嘗刺坊州人物楚楚所謂文獻
不足猶超人羣者也正大末除鳳翔治中
南山安撫使詩亦有功子玉自號虛舟居
士有集行於世如云勞生雖可厭清景亦

自適殊有古意也

郝吉甫蝸室

草草生涯副短椽身隨到處卽安然功名角上無
多地風月壺中自一天世路久諳甘縮首翹車才
值便流涎一生笑我林鳩拙辛苦營巢二十年

聽雪軒

扶疎窗外竹歲莫亦可愛蕭散軒中人高節凜相
對清寒入夢境風雨號萬籟覺來聞雪落浙瀝珠

璣碎饑腸出佳句疊疊入三昧華堂沸絲竹此樂
副兒輩

魏處士野故莊

郊原冷落霜風後桑柘蕭條兵火餘試問當時卿
與相幾家猶有舊田廬

七月十五日夜顯仁寺東軒對月

野迴雲歸盡山高月上遲暗蟲依露草驚鵲遶風
枝素影隨波遠新涼與酒宜中秋更有味試爲卜

歸期

應制狀元紅

仙苑奇葩別曉叢
緋衣香拂御爐風
巧移傾國無雙艷
應費司花第一功
天上異恩深雨露
人間凡卉謾鉛紅
情知不逐春歸去
常在君王顧盼中

疊翠柳

畫樓西畔石州山
指點雲烟識翠鬟
回首十年真一夢
淡天如水夕陽閒

題均福堂三首

憧憧車馬競春遊
不見溪堂五月秋
臥聽雲濤春午枕
夢隨鷗鳥落沙洲

爲魚爲鳥知誰是
看水看山俱得意
存亡貴賤聽天公
只有歸休須早計

歸休得計卽歸來
林下空言只可哈
莫待山靈嫌俗駕
却將鞍馬覓塵埃

次仁甫韻

金鑑詩卷二十一
三
渺渺橫烟渚淒淒挂月村酒非隣舍取詩復故人
論世態烏棲屋生涯雀在門西山却多思松雪動
吟魂

題溫容村寺壁

草樹醒朝雨烏鳶快晚晴山光自明潤野氣亦淒
清茗椀閒中味紋楸靜裏聲此懷能自適未要縛
簪纓

故城道中同元東巖賦

客亭南北厭飄零尚喜揚鑣過故城桐葉不堪追
往事泥丸猶足見民情青山閱世幾興廢白塔向
人如送迎佇立夕陽無限思西風禾黍動秋聲

晚過壽寧

稻隴分棋局松門入畫圖牛羊歸自急鷗鷺宿相
呼落日低青嶂高風起暝途歸僧上烟靄回首愧
區區

子文致君九日用安字韻聊亦同賦

金鑑詩卷二十一
旅食京華秋又殘舊遊真似夢槐安閒居浪說重
陽好塵世端知一笑難黃菊已堪增悵恨白衣無
復慰荒寒馬頭明月應相笑依舊紅塵滿客鞍

題孔氏園亭

嚴勝諸孫賢至今相承種德滿家林綠槐丹杏風
流遠翠竹蒼松歲月深傾蓋昔誰陪俊賞過庭今
復嗣徽音此生夙有東游願杖屨他時或可尋

攬秀軒

寺得新游處軒餘舊賦詩山川蒲子國松栢晉侯
祠行止非人力登臨且歲時道人應笑我真負鹿
門期

上巳前後數日皆大雪新晴游臨漪亭上

十日陰風料峭寒試從花柳問平安野亭寂歷春
將晚山徑縈紆雪未乾足踏東流方縱酒手遮西
日悔投竿淵明正草歸來賦莫作山中令尹看

奉陪太守游南湖同郭令賦

翠幄千章蔭晚空年華心賞兩無窮雲頭欲落催
詩雨池面微生解愠風經笥使君談似綺仙舟令
尹飲如虹媿隅自適清池樂不信參軍是郝隆

三月望日次邊德舉攬秀軒

水遶千家邑山圍一席天桑麻新雨露檜栢老風
烟夢後餘芳草愁時更杜鵑亦知推不去端用得
忘年

新秋

旅食京華困鬱蒸可人秋意及新晴夜窓便覺風
千里曉鏡從添雪數莖蟬噪不離羈客耳燕歸還
動故園情軟紅塵外西山色乞與閒人眼暫明

寺樓晴望

詰曲闌干面翠微蔥籠窓戶溢清暉雨侵斜日明
邊過雲望山前缺處歸多病過春猶止酒薄寒向
晚却添衣宦名不負滄波願羞見陂田白鳥飛

題五丈原武侯廟一首

仲純

籌筆無功事可哀
長星飛墮蜀山摧
三分豈是平生志
十倍寧論蓋世才
壞壁丹青仍白羽
斷碑文字只蒼苔
夜深老木風聲惡
尚想褒斜萬馬來

御訂全金詩增補中州集卷二十三

金元好問原本

張鄴城公藥 二首

公藥字元石宰相安簡公孝純永錫之孫
以文蔭入仕嘗爲鄴城令詩號竹堂集寒
食云一百五日寒食節二十四番花信風

新年云客情病裏度殘臘老色鏡中添一
年雲樹縈寒猶漠漠竹梢迎日已娟娟春
晚云細風皺綠漲溪水小雨點紅添海棠
又云芭蕉葉斜卷舒雨醪醖架小縱橫春
人喜傳之子觀字彥國仕為某軍節度副
使孫厚之字茂弘承安五年進士

許下三庚劇暑盛於他州懷思故鄉嶧山山
水真清涼境界也感而作詩

魯東百里近福地日鳧繹千峯開玲瓏絕澗瀉湍
激岱宗古獨尊象緯了不隔嶧山至泰山不遠此山許攀

聯朝著有班秩虛巖互霞蔚秀石森玉立泉聲動
環珮林樂盡竽瑟林樂出莊子樹老潤饒菌果熟香隕

實漱風松落花泓雪崖溜蜜木駮虎磨癢沙迴鳥
伸翮水禽嬉戲引吭伸翮劉禹錫集竹葉若來往桃源當甲乙曾

經晉人隱晉郗鑒因避亂挈充人來嶧山事見本傳喜脫塵網密事往
不記年人說猶前日我來官許下濁暑病逾劇慢

錦錦詩卷二十一
三
二
膚便枕簟白汗沾巾幘屢輟五夜眠輒廢中盤食
炎官令方虐著意不憐客語此作惆悵可以知得
失遙知舊經行雲起水邊石平生二三子相對坐
橫策今世葛天民何容挽之出

往鄜州

出門旋復入崎嶇行路真將蜀道如埽凍村童燒
積葉趁春田婦鬻新蔬雪花被岍中流黑雲氣涵
山衆壑虛老子頻年厭羊酪故溪新綠正肥魚

二月

二月芳事何等好南陌東城饒物華春風無意管
楊柳晴日有心烘杏花故山隨分可娛老宦游到
處聊爲家夢歸草堂捲疎箔幾點白鷗眠淺沙

任南麓詢 九首

詢字君謨易州軍市人父貴有才幹善畫
喜談兵宣政閒游江浙君謨生於處州爲
人慷慨多大節書法爲當時第一畫亦入
妙品評者謂畫高於書書高於詩詩高於
文然王內翰子端獨以其才具許之君謨
正隆二年進士歷省掾大名總幕益都都
司判官北京鹽使課殿降泰州節廳時無

藉力者故連蹇不進六十四致仕優游鄉里家所藏法書名畫數百軸日夕展玩不知老之將至年七十卒平生詩數千首君謨歿後皆散失今所錄皆得於傳聞之間如山居云種竹六七箇結茅三四間稍通溪上路不礙屋頭山黃葉水清淺白雲風往還戊申春晚云水邊團月翻歌扇風裏垂楊學舞腰南郊小隱云林邊鳥語月微

下竹裏花飛春又深前輩喜稱道云

嶺柳今何

在蘇黃世已無皇天開老眼特地降君謨

附趙秉文題南麓書後岱宗夫如何齊魯

青未了夫如何三字幾不成語然非三字無以成下句有數百里之氣象若上句俱雄麗則一李長吉耳此前人論詩也論書亦然若有學南麓書者當以吾言參之

附元好問跋金國名公書任南麓書如老

法家斷獄網密文峻不免嚴而少恩使之
治京兆亦當不在趙張三王之下黃山書
如深山道人草衣木食不可以衣冠禮樂
束縛遠而望之知其爲風塵物表黃華書
如東晉名流往往以風流自命如封胡羯
末猶有醞籍可觀閒閒公如本色頭陀學
至無學橫說豎說無非般若百年以來以
書名者多矣宇文太學叔通王禮部無競

蔡丞相伯堅父子吳深州彥高高待制子
文耳目所接見行輩相後先爲一時的南
麓趙黃山趙禮部龐都運才卿史集賢季
宏王都勾清卿許司諫道真爲一時若党
承旨正書八分閒閒以爲百年以來無與
比者篆字則李陽冰以後一人郭忠恕徐
常侍不論今卷中諸公書皆備而竹溪獨
見遺正如鄴中賓客應劉徐阮皆天下之

選使坐無陳思王則亦不得不爲西園清
夜惜也

西湖

西湖環武林澄澄大圓鏡仰看湖上寺卽是鏡中
影湖光與天色一碧千萬頃堤徑截烟來樓臺自
昏暝

濟南黃臺二首

滿目江南烟水秋濟南重到憶南游便欲移家漁

市側輕蓑短棹弄扁舟

柴扉水際晝還扃落日城頭晚更明深綠淡黃洲
渚冷敗荷無數似臨平

綠柳橋邊簇錦鞍紅紗影裏照烟鬟歸來書几高
燒燭渾似江鄉一夢閒

蘇州宴

蘇州女兒嫩如水髻聳花籠青鳳尾十二紅裳釵
梳洗植立唱歌烟霧裏一人丰穠玉手指袖挽翠

雲彈綠綺落花一片天上來似欲隨人渡江水曲
終宴闕歌一觴行人南游道路長明日松江千萬
頃烟波雲樹春茫茫

庚辰十二月十九日雪

馮夷掬水翻銀璣北風浩浩如兵威瓊臺玉樹壓
金碧三十六宮明月輝五更待漏雞人唱近衛臚
傳九天上須臾龍馭踏飛瑤萬戶千門寂相向皓
齒才人宮袖窄巧畫長睂梅半額含嚙一笑競春

妍繡勒錦韉生羽翮城外雪深迴馬首別殿傳觴
燈作晝歡聲一曲藉春謠半夜西園滿花柳霑濡
已見盈阡陌况是隆冬見三白帝力如天人得知
今慶明年好春澤

憶郎山

萬壑溪流合千峯木葉黃郎山五千丈獨立見蒼
蒼

巨然山寺

孤撐山作碧螺髻漫散水成蒼玉鱗野寺荒涼人
不到水光山影正橫陳

浙江亭觀潮

海門東嚮滄溟濶潮來怒捲千尋雪浙江亭下擊
飛霆蛟蜃爭馳奮髯鬣鉅鹿之戰百萬集呼聲響
震坤軸立昆陽夜出雨懸河劍戟犇衝潰尋邑吳
儂稚時學弄潮形色沮濡心膽豪青旗出沒波濤
裏一擲性命輕鴻毛須臾風送潮頭息亂山稠疊
傷心碧西興浦口又斜暉相望會稽雲半赤詩家
誰有坡仙筆稱與江山作勁敵援毫三叫句不成
但覺雲濤滿胸臆

附張才保定志任詢字君謨號南麓易人
字入聖畫入神性尤嗜畫

附書畫會要君謨山水在王子端下

附元王惲跋任龍巖烏夜啼帖南麓書畫
京師爲最多其擘窠大書往往體莊而神

全金詩卷二十一
九
滯獨此帖豪放飛動超乎常度而木庵師
謂醉後興逸妙能天成豈長沙率爾而顛
字字圓轉之意邪然古人得意處非一如
去乖就合意居筆先乘其調利例多高風
絕塵不只藉步兵作氣而能奪三軍之氣
也

又跋任南麓數珠帖

臨潛珍閣銘爲大陽
津張提舉彥亨賦總

一百八字王子
勉目曰數珠帖南麓書在金大定閒號稱

獨步然擘窠大書往往體莊而神滯今觀
此帖筆勢超逸氣韻兼勝豈非抵掌談笑
善學叔敖者邪

馮臨海子翼 七首

子翼字士美大定人正隆二年進士性剛
果與物多忤用是仕宦不進以同知臨海
軍節度使事致仕居真定有詩樂府傳於
世父仲尹子叔獻三世皆仕至四品職名
亦相近士美詩有筆力如賦臨海乳山萬
松堂爲可見矣

三月七日登龍尾山寺

全金詩卷二十三
十一
古城尋龍尾山城送馬蹄花濃香脰臍泉瑩冷玻璃
寒食春無幾催歸日欲西春風吹病眼煙樹遠
淒迷

佑德觀試經

琳館清深小雪殘釀梅天氣不多寒客窓竟日無人到只有蕭蕭竹數竿

書事

客舍如僧舍秋風几席清竹孫仍帶籜鳩婦已呼

晴年老心情減官卑去就輕京師名籍甚鄭子豈其卿

和張浮休舊韻

嫩水籠篁碧新霜染樹紅石潭沉曉月山雨暝秋空燈火吟窓下關河醉眼中西風喚張翰南望思何窮

小圃茅亭新成

榆柳清陰下茅亭近水滑抵簷栽美竹橫榻賦新

詩朴陋從人笑棲遲止自怡歲寒天地肅松雪有心期

贈張壽卿

美如冠玉張公子知是留侯幾世孫老境流離少
歡趣天涯邂逅對清罇貂裘聊作西州客物化終
同北海鯤十日相從又言別關山明月正銷魂

岐山南顯道冷香亭

溪橋小雪晴水村霜月冷暗香林薄閒得偶璀璨
影殷勤南夫子移植在人境芝蘭馥氤氲珠壁照
光炯小屋茅草葢幻此瀟灑景看花蒸松明醒醉
漱苔井文章聊嬉戲辭氣頗馳騁州縣不著脚時
人笑清鯁我官西州掾簿領不知省頻遭官長罵
勢屈石在頂門庭可張羅陋巷車轍靜山歌聽朝
嘶舞伎或瘤癭引睡閱文史朝日無從永夢到五
柳莊身居六盤嶺竭來南山下旅思淒以耿金壘
照衰朽玩味得俄頃傍人怪迂疎佳處當自領

史明府旭 二首

旭字景陽第進士歷臨真秀容二縣令有
詩一卷傳於世臨真上元夜雪云斜風吹
雪滿山城壓屋雲低未肯晴天女散花春
一色燭龍銜照夜三更交口楊氏莊云青
黃遶屋禾將熟紫白依闌菊半開差赴綏
德云也解笑人沿路菊不堪供稅帶山田
先人嘗從之游稱其時有佳句云

懷郭碩夫劉南正程雲翼

已將春夢等浮生更著秋光比宦情薄有酒鎖閒
日月苦無心向老功名黑城村晚鴉千點白土坡
高鴈一聲天末何人慰寥索正思張丈與殷兄

早發驪駒棚

郎君坐馬臂彫弧手撚一雙金僕姑畢竟太平何
處用只堪妝點早行圖

好問按景陽大定中作此詩已知國朝兵不可用此

則詩人之
憂思深矣

梨花

少年攜酒日尋花老去花前欲飲茶今日傳觴似
年少一枝香雪上烏紗

邊內翰元鼎

四十二首

元鼎字德舉豐州人兄元勳元恕俱有時
名號三邊德舉十歲能詩天德三年第進
士以事停詮世宗卽位張太師浩表薦供
奉翰林出爲邢州幕官復坐誣累遂不復
仕進德舉資稟疎俊詩文有高意時輩少
及如云雲鐘號曉月風絮亂春燈晚照入
簾如有意春風過水畧無痕五更好夢經

年事三月殘花一夜風拂子云驅去青蠅
讒口遠拂開黃卷聖言新雲露月華天半
白星移河漢夜微涼此類甚多

八月十四日對酒

梧桐葉彫轆轤井萬籟不動秋宵永金杯瀉酒灑
十分酒裏華星寒炯炯須臾蟾蜍弄清影恍然不
是人間景金波淡蕩桂樹橫孤在玻璃千萬頃玻
璃無限月光冷瀕洞一色無纖穎清風颯颯四坐

來吹入羲黃醉中境醉中起歌歌月光月光不語
空自涼月光無情本無恨何事對我空茫茫我醉
只知今夜月不是人間世人月一杯美酒蘸清光
常與邊生舊交結亦不知天地寬與窄人事樂與
哀仰看孤月一片白玉露泥泥從空來直須臥此
待雞唱身外萬事徒悠哉

早春

春風走塵沙鳥語滿京國東皇發潛潤土木變顏

色桃李爭嫵媚白紅姹容飾唯有松栢姿依然蔽
崖黑

村舍二首

何事區區守一丘春花過了月明秋等閒濁酒籬
邊興寂寞寒花雨裏愁不識故人今在否每思前
事隔重游西風又是青山晚落葉無聲水自流
墻外青山半在樓山村盡晚雨翛翛旃裘擁腫無
餘事罇酒飄零又一秋學得屠龍無用處祇如畫

虎反成羞回頭爲向淵魚道鴻鵠而今不願游

懷友

曾聯金轡賞春風花裏風前酒面紅行樂昔年君
我醉持觴何日我君同一聲啼鳥青春晚幾樹殘
紅野寺空相憶情懷正蕭索半山夕日水聲東

夜深

月落秋山萬象清濕螢微近露枝明夢魂黯淡家
千里鼓角淒涼夜幾更弟子亡來鄉校冷舍人別

後子虛成銀河漸轉梧桐黑何處江湖望客星

春花零落

春花零落鴈秋悲已過流年二十期有舌能忘坐
羈辱無金莫怪下機遲世情冷熱雖予問人事升
沈未汝知何日上方容請劍會乘風雨斷鯨鯢

出門騎馬

出門騎馬卽三千面目塵埃動慘然生計若爲田
一二項饑顏翻愧宦三年乾坤造物能無用富貴由

時枉自鞭達否從今已知計五湖煙裏有漁船

帝城

帝城回想夢魂中秋月春花在處同朱雀橋南三
月草鳳凰樓上四更風錦囊別後吟箋少玉笛閒
來酒盞空贏得當時舊標格九分憔悴入青銅

新香

新香終比舊香濃只是相逢久不容繡被瞥同巫
峽夢銀鞍多負景陽鐘寶檀煙斷閒金獸玉鎖聲

傳惱睡龍簾影漸分風又起一塘秋水落芙蓉

聞簫

弄玉吹簫玉琯低秋風散入滿天悲滄波夜漲龍
吟細琪樹霜風鳳嘯遲漢月有情如靜聽蕭郎無
路不相知秦樓虛負清宵意惆悵乘鸞舊有期

和致仕李政奉韻

車馬年年陌路塵安知六驥過窓頻雲泉是處堪
爲樂軒冕從來只累人浮世夢中無限事紅顏花

上霎時春五湖典有扁舟笛好在晴天月一輪

別友

從來雞鶴不同羣涇渭何人與細分鏡裏光陰誰
念我雲中岐路已饒君清觴且吸年時月白雪休
徵夢裏雲別後相思不相見水邊黃葉莫山村

送妹夫之太原

山含秋氣冷參差送客西城落日低怨別弟兄歸
快快戀鄉車馬去遲遲浮萍聚散元無定流水東

西却有期惆悵黃榆故山路碧天回首鴈南飛

惜春

春來春去惱春晴
花落花開又幾經
夜雨多情愛沾灑
楊花無賴只飄零
每成宴賞須成醉
不恨歸來却恨醒
眼見紅英留不住
綠枝深處一星星

客思

客思逢春易感傷
不堪殘淚愛家鄉
離親恍惚來千里
餬口淒涼在四方
羞向孫劉圖富貴
浪從李

杜學文章官街坐對黃昏月半屋清燈滿地霜

莫鐘

落日行人斷深秋
暝雨殘一聲烟樹外
千里莫山寒倦鳥方知止
哀猿冷不安蕭蕭風葉下
時與野僧還

夢斷

繡枕紅衾晚意濃
啼嬰大似不相容
夢魂苦恨歸來早
不盡瀛洲第一峯

花開人散二首

花開人散正消魂
花語無情獨閉門
看卽春光留不住
一聲啼鴉又黃昏

閒花閒草滿芳洲
春水無人自在流
白日遲遲倦游子
一聲啼鳥一聲愁

聞笛

雌鸞無鳳怨西風
月女愁寒淚灑空
牙板急隨聲不斷
滿天敲碎玉玲瓏

王文伯還家詩以迎之

陌上東風故國春
瘦驂羸僕倦行塵
十年一夢成何事
千首新詩不負人
重對孤燈聽軟語
遞憐華髮各清貧
西齋煙草應如舊
桃李新溪滿四隣

晚行

隔浦行聞晚寺鐘
斷坡寂歷對寒松
蒼煙莫合孤城暗
破月微昏遠岫重
宿翼飛投空自急
斷蓬無計竟何從
新年又入應添歲
歸把青銅怨莫冬

山中

世路風波老不禁一廛歸買就槐陰坐詩爲累言
難解因酒成狂病轉深山月荒涼窺斷夢壁燈青
黯伴微吟十年積毀應銷骨豈礙孤雲萬里心

自歎

終日忘言一炷香散花時復遶繩牀久貧自沃三
彭熾一醉齊休六賊狂道士生涯孤似鶴衲僧門
戶冷於霜自知衰病耽杯酒擬及溫柔老是鄉

新秋示友

一頃山田半已蕪閉門高臥著潛夫不才分作溝
中斷舊好誰瞻屋上烏南阮強須攀北富東丘何
用歎西愚自憐幽默相忘久鬪鳥鳴蟬枉叫呼

偶題二首

當年樂事歎今衰人世空驚日未移風榭醉眠摧
鳳燭雨窓狂飲殢蛾眉長松茂草窮年事野水孤
村入夢時強鑷鬢絲臨晚鏡瞥然塵念不勝悲

短髮臨風懶不冠
窪樽塵坐寂無歡
離騷夕賦醒
尤獨孤憤空書說
轉難晚節慣成林
壑僻幽居深
入水雲寒
蒼崖瘦栢無窮思
鷓立溪頭盡日看

新居

鏡裏巖花落澗泉
對窓青壁便參天
幾當雪月開
春酒時有松風入
夜絃遠刷山田
多種黍稀經城
市少言錢平生謾
忽王公貴俯仰村
隣更可憐

閒題

十年一夢到灰心
歸鬢吳霜漸欲侵
物外少逢稀
有鳥冶中仍作不
祥金閒雲閣雨中
何事枯木因
風亦自吟却歎淵
明非達道無絃猶
是未忘琴

答文伯二首

老情無賴畏虛勞
已絕朱絃又一操
閒事每來知
酒聖浮生欲去愧
僧高息心鐘鼎休
看鏡安枕茅
茨不夢刀遙羨郭
西王處士道傍羸
馬咏風騷
曉窓清鏡卷浮埃
恨入新秋不可裁
露浥野花三

金鑑詩卷二十三
徑合風傳雲壑七松哀忘機魚鳥真相識落手功名亦儻來萬古消沈一杯酒只須白骨點蒼苔

閱見一十首

君居淄右妾河陽平白相逢惹斷腸蠟燭已殘歌欲闕併教離恨遶飛梁

蕭史吹笙鳳女臺月高霜冷鳳笙哀不堪好酒沈沈夜又遣青鸞獨自來

鳳紙銜封玉鏡臺繡鸞傳記已相猜傾城笑臉千

金樣莫對閒人一例開

歌裏冲冲笑裏嗔深情會處幾何人憑君爲向五陵道冶葉倡條不是春

笑裏低眉引醉波閨風秋月一聲歌明知畫燭無情物何是樽前淚更多

笑不成歡歌斂眉景陽鐘動酒闌時此情却羨牽牛會一歲相過可是遲

牛女佳期歲一過都緣迢遞隔金河可憐馬上香

車畔只隔珠簾更不多
輕蓮素質澹蕭蕭葉密溪深未可招
雨暗蘭舟人去後却容白鷺逞風標
雙鸞夾鏡鳳橫釵捧額黃梅小鴈排
爲報阿環休調戲雙成西母總相猜
膩髮堆雲鏡舞鸞五雲仙洞接清歡
歸來失却吹簫伴腸斷崑山昨夜寒

御訂全金詩增補中州集卷二十四

金元好問原本

李承旨晏

七首

補五首

晏字致美高平人唐順宗第十六子福王
綰之苗裔父森字彥實工於詩有云少年
日日醉花邊短白長紅一一憐自笑老來

心尚在惡風常廢五更眠又賦梅云冰骨
有香魂乍返玉顏無暈酒全消人多傳誦
之致美皇統二年經義進士釋褐臨汾丞
時張太師浩判河陽一見愛其才爲之延
譽稍遷遼陽幕官與興陵有藩邸之舊入
翰林爲學士高文大冊號稱獨步拜御史
中丞初遼入掠中原人及得奚渤海諸國
生口分賜貴近或有功者大至一二州少

亦數百皆爲奴婢輸租爲官且納課給其
主謂之二稅戶大定初一切免爲民間山
寺僧賜戶三百與僧共居供役而不輸租
故不在免例訴者積年臺寺不爲理又訴
於致美致美上章大畧謂天子作民父母
當同仁一視分別輕重乃胥吏舞文法之
敝陛下大明溥照豈可使天下有一民不
被其澤者且沙門旣謂之出家而乃聽其

與男女雜居乎書奏宰相持不可世宗詔致美與相詰難致美伏御座前曰前日車駕幸遼東闔山寺曾供從官一宿之具寺僧物陛下物也陛下無以此直寺僧而使三百家受屈世宗大笑曰李晏刼制我耶卽日免之明昌初爲禮部尚書分諸道府試復經義設經童科皆自致美發之出爲沁南軍節度使告老不從改昭毅軍節度

使且授子仲畧澤州刺史以榮之時澤潞旱甚致美擅發倉粟三萬石救餓者因上章請罪章奏而本道提刑彈章亦至章宗謂宰相言提刑職當然李晏義當然不之罪也仲畧字簡之大定二十二年進士仕至山東路按察使道陵愛其俊快比爲脫帽鷓云致美自號游仙野人簡之丹源釣徒有集傳於世簡之之子肯播字克紹肯

全金詩卷二十四
三
獲字克守肯德字克修

白雲亭

白雲亭上白雲秋
桂棹蘭橈記昔游
往事已隨流水去
青山空對夕陽愁
興亡翻手成舒卷
今古無心自去留
獨倚西風一惆悵
數聲柔櫓下汀洲

贈燕

王謝堂前燕秋風
又送歸向人如惜
別入戶更低飛海
濶迷烟島樓高近
落暉不知從此去
幾日到

烏衣

通州道中

冉冉年華老飄飄
客路難塵埃山色
斷雲霧日光寒念
遠心先折孤吟鼻
亦酸平生江海意
潦倒愧儒冠

高麗平州中和館後草亭

藤花滿地香仍在
松影拂雲寒不收
山鳥似嫌游客到
一聲啼破小亭幽

題武元直赤壁圖

鼎足分來漢祚移，阿瞞曾困火船歸。
一時豪傑成何事，千里江山半落暉。
雲破小蟾分樹暗，夜深孤鶴掠舟飛。
夢尋仙老經行處，只有當年舊釣磯。

遊龍門回投超化寺

精藍三日飽溪毛，俗累紛紛覺可逃。
探水尋源通月冷，披榛得路接雲高。
山圍故壘懷千古，河轉孤巖激怒濤。
回首烟霞應笑我，人間官職倍徒勞。

還邀二三子，共到鑿龍遊。
冷壑泉初動，春巖氣欲浮。
竹藏深崦寺，人渡晚行舟。
始覺山風急，歸鞍不自留。

潞州形勝

東迎壺口壘，羣山吞吐嵐。
光紫翠閒削，玉遠排珪首。
銳暈痕輕拂，黛眉彎五龍。
飛去松杉老，萬井喧囂日月閒。
遊客乍醒塵土眼，仙扁誰指扣玄關。

白巖山 二首

只有山光無水聲我疑神物固巖扃如何鑿得飛
泉出當爲山僧叱六丁

山寺尋春春已歸紫梅猶有折殘枝老僧兀坐如

枯木花謝花開總不知

白巖寺羣山環抱村落相望亦奇觀也惜乎無水因

作絕句書石
應有水出

嗅梅圖

仲 畧

隴隴霽色冷黃昏缺月疎籬水外村人在天涯花
在手一枝香雪寄銷魂

蓮塘陪諸公賦

潦倒何堪接俊遊神仙空羨李膺舟官曹只在空

湖畔簿領如山屋打頭

省幕在城外
極卑陋故云

二
六
二

王都運寂

七首

寂字元老薊州玉田人系出三槐父礎字
鎮之國初名士仕至歸德府判官元老天
德三年進士興陵朝以文章政事顯終於
中都路轉運使壽六十七諡文肅有拙軒
集北遷錄傳於世三子欽哉直哉鄰哉俱
爲能吏元老專於詩有云生涯貧到骨家
具少於車元夕感懷云殘夢關河鼇禁月

舊游燈火馬行春留別郭熙民云五年風
雪黃州閏萬里關河渭水秋與涿郡先主
廟詩當年竹馬戲兒曹笑指樓桑五丈高
故國神游得無恨壞垣風雨夜蕭騷人共
傳之行記載其先人雞山一詩云記得垂
髫此地遊雞山孤立水平流而今重過山
前路山色青青人白頭予謂詩固佳恨其
依倣蘇才翁太甚耳

肌殊可人想得乞漿尋舊約東風不似去年春

沁水山寺

兩峽山高月半輪五更人起馬嘶頻無端又上長
安道輸與僧牕飽睡人

奉題少保張公曲阿別墅二首

休沐時時散馬蹄綠陰如染轉長堤帝城和氣融
春圃相國餘波到兩溪無數龜魚欣作主不言桃
李自成蹊聖時正要傳衣事賀監從渠老會稽

鍾湖亭下水淙淙綠野平泉未易雙十里藕花紅
步障一軒松蔭碧油幢洛中獨樂有司馬天下不
名知曲江紙尾欲煩賢宅相雨蓑添我坐篷窓

附長安客話涿州境東南有漢盧植墓土
人呼爲南臺金王寂詩南臺故址今頽然
漢盧植墓疑相傳

蓮峰真逸喬辰

一首 補二一首

辰字君章初名逢辰洪洞人天德三年進
士詩樂府俱有名子字德容八歲能鼓
琴召入東宮顯宗稱其不凡大定十六年
登科貞祐初爲益都按察轉運使與田涿
器之俱歿兵間

附元好問琴辨引彥實苗君平陽人童弗
中爲鄉先生喬孟州辰君章所器命其子

河東按察轉運使宇德容與同研席君章
文學深博兼通音律教彥實與德容琴事
初授指法累錢手背以輕肆爲禁至一聲
不敢妄增損彥實後以雅重見稱有自來
矣弱冠應明經舉選三赴廷試至論知琴
亦與德容相先後當熙宗守成之際惟弄
琴爲樂而已琴工衛宗儒者一日鼓琴不
成聲問之故曰山後苦寒手拮据耳卽賜

之貂鼠帳熾炭其前使鼓之世宗好此藝
殊有父風寢殿外設琴工幕次鼓至夜分
乃罷嘗言吾非好琴人主心無所任則營
建征伐田獵寵嬖何所不有吾以琴繫著
吾心耳一侍從鼓琴東宮衣著華麗上以
輕浮勅不得入宮至顯宗又妙於琴事者
也三四年之間此道大行而彥實出於
其時近臣有薦於章廟者因得待詔翰林

居京師未久而聲譽籍甚至廢舉業不就
南渡後日從楊趙游閒閒嘗有詩推敬故
詩人止以高士目之公藝既專又漸於敦
朴之化習與性成其分別古今操弄孰雅
孰鄭猶數一二而辨黑白也常選古人所
傳操弄百餘篇有古意者纂集之將傳於
世危急存亡之秋良未暇也長子名某字
君瑞嘗仕爲省郎閒居燕中悼雅道之將

廢而先意之不究將斲木以傳請予題端
且以卜當傳與否也予謂君瑞言子第傳
之山谷有云枯木嵌空微暗淡古器雖在
無古絃袖中正有南風手誰爲聽之誰爲
傳東坡有二云琴裏若能知賀若詩中定合
愛陶潛予切謂南風手不可得而今世愛
陶詩者幾人果如坡谷所言唯當破此琴
爲烹鶴之具耳夫八音與政通爲難審音

以知政居今而行古又爲難合是二難始
有此書乃欲藏之名山以待其人乎司空
表聖最爲通論云四海之廣豈無賞音固
應不待五百年耳請以此爲之引歲丁巳
秋八月初吉遺山詩老引

凌虛堂

木暗蒼烟合池荒碧草深高臺平竹杪幽徑入花
陰奔走成何事登臨慰此心晚涼山更好風處一

披襟

興慶夜月絕句

花萼樓傾有故基行人空讀火餘碑可憐興慶池
邊月曾伴寧王玉笛吹

翠貞菴訪晦之不遇

飛錫南遊久未歸北藍清勝與誰期明窓但見橫
經處靜坐還思酌茗時獨誦隔林機杼句謾題渴
井轆轤詩翠貞菴外千竿竹嘯月吟風待阿師

劉左司昂

一十一首

補一首

昂字之昂興州人大定十九年進士曾高
而下以科名相踵者七世矣昂天資警悟
律賦自成一家輕便巧麗爲場屋捷法作
詩得晚唐體尤工絕句往往膾炙人口張
秦娥者頗能小詩其賦遠山云秋水一抹
碧殘霞幾縷紅水窮霞盡處隱隱兩三峯
其後流落之昂贈詩云遠山句好畫難成

全金言卷二十四
古
柳眼才多總是情今日衰顏人不識倚爐
空聽煮茶聲又云二頃山田半欲蕪子孫
零落一身孤寒牕昨夜蕭蕭雨紅日花梢
入夢無娥爲之泣下屏山故人外傳記之
昂早得仕年三十三省椽考滿授平涼路
轉運副使人謂卿相可坐致矣術士有言
之昂官止五品者之昂自望者甚厚不信
也俄丁母憂爲當塗者所忌連蹇十年卜

居洛陽有終焉之志有薦其才於道陵者
泰和初自國子司業擢左司郎中將大用
矣會遼陽人大中欲搖執政賈鉉爲言者
所劾辭連之昂道陵震怒一時聞人如史
肅李著王宇宗室從郁皆譴逐之鉉尋亦
罷政之昂降上京留守判官道卒竟如術
者之言

醉後

禪僧勸讀傳燈錄道士教行進火功今日興來俱
破戒黃花籬落醉西風

山中雨

嵩高山下逢秋雨破繖遮頭過野橋此景此時誰
會得清如窓下聽芭蕉

都門觀別

買酒消閒愁剪刀剪流水閒愁不可消流水無窮
已悠悠窓下斷腸波總是行人墮淚多門外馬嘶

思遠道小嘔猶唱渭城歌歌聲未斷征鞍發望斷
垂楊人影滅斜陽照影却歸來兩地相望今夜月
闕人多矣主人翁離別都歸一笑中陌上行人終
不悟年年楊柳怨春風

客亭

折盡官橋楊柳枝春風依舊綠絲絲啼鶯爲向行
人道離別何時是盡時

山堂

山雨溪邊過山堂夜獨吟悠悠松上月照見壁間
琴

弔張維翰維中兄弟

蓮幕清曹粉署仙福兮禍倚豈其天座隅異物鵬
來止地底佳城馬不前萬里青雲今已矣兩枝丹
桂竟徒然阿奴莫愛聲名好碌碌持家亦自賢
維翰
名甫第一人擢弟維中名庸此榜乙科阿奴謂冉
冉字維賢後以省元登科兄弟科名如此近世所
未有也

卽事二首

雨洗明河畫扇收胡牀露冷藥欄秋墻陰未得中
庭月一點螢光草際流

山花山雨相兼落溪水溪雲一樣閒野店無人問
春事酒旗風外鳥關關

歌風臺

劉項興亡轉燭過亂蟬吟破漢山河長陵臥老咸
陽月沛上猶傳擊筑歌

弔李仲坦 仲坦物故後省試魁始有特恩之命
文章巧與世相違身後新恩事已非不及萋萋原
上草一番春雨綠如衣

王官谷

潛溪時照塵埃客微雨不遮天柱峯斜日落花人
去盡淡烟樓閣數聲鐘
一峯凝碧倚晴空一水縈紆一徑通中有幽人曾
說古誰知高興與今同

附堯山堂外紀劉之昂山中雨詩曰嵩高

山下逢秋雨破傘遮頭水沒腰 中州集作
過野橋

此時此景誰會得清如窓下聽芭蕉祝枝
山誦此詩嘗哂其上下淋漓清在何處

魏內翰搏霄

三首

搏霄字飛卿初用蔭補以薦書從事史館
明昌中宏詞中選授應奉翰林文字未幾
卒飛卿詩以富艷稱如張公子席間賦嵩
山筆力豪逸党承旨許其在劉無黨之上
云

送河南府尹張壽甫赴闕

夜半恩綸出漢宮朝家虛席待燕公春風已徧湖

山外元氣還歸鼎鼐中侍從定誰陪白鳳低回空
自惜冥鴻洛川萬頃蒲桃碧長與清愁日夜東

田若虛遊龍門寶應用天隨子體賦詩因次

其韻二首

少室右臂禹所斷開排清伊來高寒土肉養石自
古秀山腰流泉無時乾佛髻滴滴染濕翠松風颺
颺鳴驚湍白傅已矣不可見予誰從之投歸鞍
闕塞若廐馬奔騰多奇麗慙爾不可沮西來何慙

慙駿足忽勒破英才如拘龐有客善體物新詩留
僧牕晏輦豈足道微瀾生盆缸徑續杞菊意來浮
玻璃江吏部昔竄謫猶能題臨瀧況此六大寺礎
堂時鳴椿紫翠出萬瓦天風旋珠幢興寄百斛鼎
無才誰其扛會聽項籍約吾將從之降

御訂全金詩增補中州集卷二十五

金元好問原本

許內翰安仁

六首

補二首

安仁字子靖河間樂壽人大定七年進士
歷禮部員外郎出守澤州遷同知河南府
事以汾陽軍節度使致仕子古字道真父

子俱名流也

補金史安仁爲澤州刺史作無隱論上之
凡十篇曰本朝曰情欲曰養心曰田獵曰
公道曰養源曰冗官曰育材曰限田曰理
財

望少室

名山都不見真形萬仞盤盤入杳冥安得雲間騎
白鶴下看三十六峯青

送二道者歸汾州

介休山下兩閒人來訪汾陽舊使君明日却歸塵
外去一雙白鶴上青雲

草木蟲魚詠二首

蠅鑽故紙竟不悟蛾撲明燈甘喪生大似盲人騎
瞎馬不知平地有深坑
蓬在麻中應自直蕙生松下亦能高不關若輩工
攀附物理由來繫所遭

少室道中

少室峯頭曉月沈，千家城郭淡陰陰。
五更雞唱殘星滅，馬上看山過少林。

遊泰安竹林

蕭寺天教勝處安，峯巒騰擲水雲閒。
客來總說遊山好，不道山僧却厭山。

遊法輪院

太行岡嶺橫漫漫，撐空一帶雲霞間。
巨鰲背負九

州出重重山上復，有山高都城頭見。
松嶺突兀雙峯螺髻並，招邀析城揖王屋。
指顧硤石瞰天井，蕭蕭楓葉滿山秋。
巖巒掩抱雲林幽，攀崖轉壑路欹側。
雖有佛刹誰曾遊，年豐郡邑閒無事。
琴酒招呼二三子，題詩古壁贈山僧。
畧記衰翁曾到此。

少林寺

巖壑深嚴入翠微，少林金碧露烟霏。
五峯屏簇禪庵小，萬劫天開佛日輝。
聞說九年深面壁，得逢二

祖便傳衣千秋少室山靈在曾見神僧隻履歸

附嵩嶽志少林寺西北里許五乳峰下有達摩菴又深入里許爲達摩面壁庵面壁石在庵前上有達摩洞又寺西南爲二祖菴寺南爲少室山金許安仁有詩云云

附遺山集眼醫許太丞彥清示其從祖汾陽君山水圖詩語意高妙而其字畫與明昌龍巖黃華黃山諸公各自名家世尤寶

惜之其子右司諫道真亦以能書稱今以汾陽筆法較之父子如出一手生平亦嘗見蔡太學安世大丞相伯堅濰州使君伯正甫三世傳字學雖明眼人亦不能辨前輩守家法類如此汾陽守澤州日戒子云婁相任唾面周廟貴緘口寸陰大禹惜三命考父走吾河東人至今傳頌之司諫在貞祐興定閒直言極諫與陳公正叔齊名

時號陳許父子名流在中朝百餘年少有
似者而彥清承其後何其幸耶此詩渠家
青氈其寶惜之當令後人知世德之所自
云

王隱君礪

一十三首

礪字逸賓先世家臨洛至逸賓遂爲汴梁
人博學能文不就科舉孝友天至非其食
不食家無饑石之儲晏如也明昌中故相
馬吉甫惠判開封舉逸賓王彥功游宗之
德行才能逸賓得鹿邑主簿就乞致仕彥
功以親老調鞏州教官宗之讓不受三人
者雖出處不齊而時人皆以高士目之閒

閒公嘗集黨承旨趙黃山路司諫劉之昂
尹無忌周德卿與逸賓七人詩刻木以傳
目爲明昌辭人雅製云

附趙秉文遺安先生言行碣先生姓王氏
諱礪字逸賓其先臨洛人先生實生於汴
梁嘗以洛川自稱不忘本也自幼穎悟絕
羣外頗如也初學詩於伯父震落筆驚人
震自以爲不及未幾詩名大振加之孝於

親友於弟誠於人篤於已遠近論大行必
曰王逸賓矣初孟公宗獻友之馮公璧叔
獻趙公颯文孺皆師尊之先生天性謙至
待之反若居已上及數公相繼魁天下直
玉堂然後先生之道益尊名益重朝賢兩
薦明德先生以書抵故人之位清要者苦
以親老爲辭議遂寢明昌末聖天子詔舉
德行才能之士鄉人耆德諸生五百餘人

金鑑言卷二十五
薦先生孝義忠信文章爲世師表朝廷以
素知名特賜全進士授亳州鹿邑主簿先
生年幾七十矣以目苦昏暗卽日移文有
司以老疾乞致仕朝廷猶以半俸優之首
葺先塋次以分惠親舊計月而盡泰和三
年八月二十有七日以疾終於家臨終神
色不變戒其子棺周於身足矣語畢而逝
葬於祥符縣魏陵鄉蕭氏之園先生教人

先行後文與人交終始不易居喪齋蔬衰
服不去身二年與二弟同居終身無間言
平居循循醇謹視若無能爲至不義矯如
也其詩冲淡簡潔似韋蘇州嘲戲風月一
言不及也所與遊皆世知名士若文商伯
起張公藥元石及其子觀彥國王琢景文
師拓無忌酈權元輿高公振特夫王世賞
彥功王伯溫和父左容無擇游道人宗之

路鐸宣叔右丞唐括文正公鎮南都以禮
致之不能屈及與貧士談饑坐終日不知
誰爲主誰爲客也嘗冬日詣一親知家會
坐客滿主人貧窶爲代給所須坐客疑其
寒色物色所得乃典錦衣以贈也喪其母
鄉鄰或賻以布帛拜而受之異日復歸其
人曰吾親安吾貧義不可受也其廉介類
此其真純之德卓絕之才淵深之學廉正

之操黃叔度陶淵明元紫芝司空表聖之
徒歟秉文明昌間參河南轉運幕過相謁
坡軒居士酈元輿居士曰君知王逸賓乎
斯人當今顏子也君不可不埽門求見之
旣見曰酈公知人矣自是之後虛往實歸
及其重來墓木已拱嗚呼使子雲見之不
當絕歎於李仲元蘇元明見之不當見稱
於元子不意千古之下復有斯人乃伐石

樹碣用旌不朽於是爲之銘銘曰居今而
行古身晦而名章不獨以詩昌猗

莫春郭南

大梁城外孤臺傍煙昏水碧春林芳憑高極目見
歸鴈風物令人思故鄉紫金山下斜陽莫萬里川
光照雲樹山間細雨花落時何人來往東風路

記南塘所見簡孟友之

大橋南郭野橋東十里垂楊十里風渺渺烟波連
御道離離雲稼入郊宮雨滋蔓草曉逾綠日暎荷
花晚更紅登覽只宜開笑口尊前六客四衰翁

次文遠韻

野性唯便閒寂居蒼苔鳥跡滿庭書林花過雨紅
猶重籬竹和烟翠亦疎已與農人成保社更令兒
輩學耕鋤賞音只有東郊客日袖新詩到敝廬

謝竹堂先生見過

學稼古寺側結廬高柳陰音書故交絕歲月杜門

深新雪添衰鬢寒灰死壯心西州賢別駕連日肯
相尋

次友之秋日雨後韻

洛州秋雨後幽勝可供閒白首留他縣歸心遶故
山野泉來竹底危磴入雲間尚記登高會重巖細
菊斑

寓居南村

朝來出門無所適野徑雨晴沙不泥鼓笛誰家賽

春社杖藜隨過柘岡西

雜詠七首

陰陰綠樹闇庭除散盡鳴禽靜有餘獨對爐薰坐
終日會心惟有漆園書

瓦爐柏子細烟消閒讀禪經破寂寥風細月高人
已靜隔牕疎竹夜蕭蕭

晴日南溪物色饒草芽新綠凍全消金絲柳底洲
沙沒數尺流波拍夜橋

南畝東臯春務時田家候雨罷耕犁却汲井泉澆
藥圃更疏陂水灌麻畦

竹繞沙村水漫流鳩鵲瀟瀟對沈浮一竿便擬從
漁父卷置琴書買釣舟

屋頭叢木撼蒼烟風卷飛花到枕邊南寺有僧來
問字打門驚覺午牕眠

漢梁王苑古臺西秋思紛紛獨杖藜雲壓高城鴈
飛盡一聲寒角夕陽低

劉治中濤

六首

濤字及之夏津人明昌二年同進士用戶
部尚書孫鐸薦入翰苑歷太原運副汾州
倅入爲太子贊善以彰德治中致仕尋卒
沁南節度康塘良輔葬之林慮之寶巖

小雪

黃紬被暖起還慵小雪經簷落旋空舊館簿書寬
半餉冷官庭戶滿西風馬遭箕窘三山瘦人坐詩

工五鬼窮安得東風囑桃李也教春色到衰翁

和德卿雪

南華香火是真依不學呼鷹雪打圍梁苑舊遊荒
徑改穎濱新唱綵箋飛春生東閣酣朝飲寒入西
鄰泣夜機夢寐扁舟釣江水重嗟白髮此心違

井陘

寒厭歲崢嶸山陰日少晴敗眠雞小梗勸坐火多
情便面堪長路牽頭破老兵誰教戀升斗盡室此

途行

宿平遙集福寺

院僻和僧靜門閒與晝長燕泥朝雨淖蝶藥晚風
香野興煎詩思乾愁繞客腸青奴如解事供我莫
牕涼

送王純叔守曹州

柏路人看御史驄年來眼落簿書叢單車乍別金
鑾月五馬頻嘶玉勒風故國山河連小鄆舊家雞

金鑑詩卷二十五
十一
犬識新豐遙知別後詩成處醉袖淋浪密炬紅

戲用前人語題天平別墅

表聖當年絹五千休休亭下買林泉黃華面目君
還見天柱峯高不值錢

劉左司中

二首

中字正夫漁陽人屏山故人外傳云正夫
爲人短小精悍滑稽玩世中明昌五年詞
賦經義第詩清便可喜賦甚得楚辭句法
尤長於古文典雅雄放有韓柳氣象教授
弟子王若虛高法颺張履張雲卿皆擢高
第學古文者翕然宗之曰劉先生以省掾
從軍南下改授應奉翰林文字爲主帥所

重常預祕謀書檄露布皆出其手軍還授
左司都事將大用矣會卒有文集藏於家
周德卿嘗謂正夫可敬從之可愛之純可
畏皆人豪也

冷巖公柳溪

斗印輕拋繫肘金故園風物動歸心柳含烟翠絲
千尺水寫天容玉一尋山色只於閒裏好風波不
似向來深人間桃李栽培滿換得溪南十畝陰

龍門石佛

鑿破蒼崖已失真又添行客眼中塵請君看取他
山石不費工夫總法身

路司諫鐸

二十六首

鐸字宣叔伯達之子與弟鈞和叔父子俱有重名而宣叔文最奇尤長於詩精緻溫潤自成一家任臺諫有古直臣之風貞祐初出爲孟州防禦使城陷投沁水死有虛舟居士集得之鄉人劉庭幹家

補金史路鐸爲景州刺史述十二訓以教民上詔曰路鐸十二訓皆勸人爲善遍諭

州郡使知之

書州驛壁

雉堞俯已見羊腸行尚難
炊煙界沮水老木識橋
山時廢無人弔臺高有鳥還
客懷秋館雨未老鬢
先斑

王子端挽辭

才名如此不償窮再入承明一病翁
白髮光陰文字裏黃華林麓畫圖中
謫仙猶想屋梁月荆產空

懷松下風聊應世緣緣故在會看歸鶴語遼東

慶壽寺晚歸

九陌黃塵沒馬頭眼明佛界接仙洲
清溪照眼紅蕖晚禪榻生涼碧樹秋
少室宗風開木義裕陵遺墨爛銀鈎
對談不覺山銜月只爲松風更少留

賦丈室碧玉壺善甫賦詩鐸亦奉和二首

心知雲路等榆枋戲作方壺當玉堂
虛靜自應詳止止逍遙均是一蒼蒼
心含寶月無中外身著青

霞可頡頏政爾天遊到疑始覺知誰送竹風香

隨人作計魚千里知命無憂鳥一天碧落雲深堪

避世碧落洞名九華煙暖可忘年平章萬有歸玄覽收

拾方心入大圓上界真人自官府不妨聊作橘中

仙

次韻答季通

華顛何意軟紅塵霄漢聊收退鷁身方喜長松倚

東野又從淨社得遺民高山流水知音少霽月光

風發興新賴有好詩相慰籍不然開口欲誰親

雨中

月翳有時吐風薰俄自清雲迴暑天影雨進夜牕

聲眠聽叅天籟神游得化城覺來還故處飢鼠撼

燈檠

輞川

畫圖風景是亭榭歲年非秋色半黃落人煙深翠

微暗溪魚得計杳靄鳥忘機觸物增惆悵吾廬早

晚歸

高唐劉氏駐春園

風光去人無咫尺人自塵勞不相及此心既定境
從之雪樹霜林亦春色劉翁有道久陸沈十年種
樹今成陰醉鄉天地白日永鷓鴣栗留皆好音良
辰行樂今已矣依舊東流泛蘭芷誰道青春挽不
留鯉庭看取新桃李膏車秣馬吾將歸擔與清景
相追隨安用苦求三徑資明月常滿千家墀

赫仲華求賦鄴臺張氏野堂

白沙翠竹小江村路轉西郊隔市塵入坐好山如
有素忘情鷗鳥澹相親芋魁飯豆平生足澗草巖
花各自春得酒誰能更羈束不妨倒著白綸巾

題鄒公所藏淵明歸去來圖

牛刀小試義熙前一日懷歸豈偶然有意候君門
外柳無機還我酒中天貞姿佳菊秋霜裏真意南
山夕鳥邊善學展禽唯此老萬人海裏小斜川

衛州贈子深節度

淇上風光萃一樓尊前北海百無憂平分玉鑑漁
村晚西望黃雲寡婦秋望一卷一作斜照鈞簾納煙翠微
颺高枕看安流梅天消息和羹近老穉寧容挽鄧
侯

潼關

樓迴臨飛鳥車行汗十牛地靈開翠壁天遠送黃
流趣戰如姦計當關豈壯猷天梯且失守況說土

山頭

七夕與信叔仲荀會飲晚歸有作

秋香瀉月笑談香飲散歸來夜未央闕角星河搖
淡影柳行燈火試新涼雄飛勲業歸時輩信美江
山著漫郎萬事浮雲心鐵石休將梁國嚇蒙莊

襄城道中

有言長官
暴橫者

禾黍低風汝水長遲遲驛騎困秋陽病軀官事交
相礙夢雨行雲肯藉涼盡說秋蟲不傷稼却愁苛

政苦於蝗詩成應被西山笑已炙眉頭尚否臧

感寓

泫泫一水抱山流路轉岡陵到渡頭張翰秋風動
歸興惠崇烟雨著孤舟祿輕道重從三黜日莫人
遙發四愁世事悠悠莫回首聊憑酒聖作天游

冠氏雨中

氣肅關河萬綠摧遠遊節物動悲哀人牛不見曉
烟重草樹有聲山雨來老矣何堪米鹽事中之安

得聖賢盃遙憐鶴髮孤雲底日望林梢一葉迴

細香軒三首

花氣爐烟總不同
嘒青噴翠小牕風
中邊故嗅渾無有心跡
相忘忽暗通

閣雨含風戶牖涼
聞機才發興何長
無心孤竹那能爾
自是詩人知見香

霜雪青青玉一叢
肯從桃李藉薰醲
不知香界何從立
憑仗清風問籀龍

芳梅如佳人贈襄城衛昌叔

芳梅如佳人不見令人思豈無桃李顏夏蟲篤於
時霜風靜天宇蘭悴菊亦衰凌寒一笑粲功烈如
彼卑幾年幽西路赭岡望逶迤思之不得見空吟
水曹詩夜月將夢去雲深水之湄邂逅疎竹邊
我認風儀今日真見止昨夢猶著龜塵中儻儼子
謂我酷好奇逃空聞足音此心胡不夷

遂初園詩

閒閒堂

行邁已自勞坐忘猶有爲動靜二塵耳一真非卽
離舉頭見青山曲肱轉黃鸝心安萬境寂境轉何
妨隨

思立堂

塵世一何隘永懷耿中情端著得吉卜有鶴戾天
鳴慨然趨予褰雲旗渺遐征鴻濛偶相值笑我勞
經營駕言還故鄉方寸以道寧先疇理耘耔初服
紉芳馨諦觀九州事曾不出戶庭漁父有默識舖

饋愈於醒

汴梁公廨西樓二首

官舍誰言隘西樓興不窮閒雲欹枕裏飛鳥捲簾
中風定天還水烟虛月度松回觀猶有愧破屋著

盧仝

盧仝以方處士王逸賓

雲態看來變簷陰坐次移一蟬吟未了雙鳥去何
之薄宦槐安夢浮名劒首炊安心元有法遣興可
無詩

次韻酈著作病起

元
玄晏耽書昔坐癡如今手板對山持病知居士安
心處貧是詩人換骨時單見敢叅東觀論徐行休
歎後山遲山林朝市元無異怨鶴驚猿自不知

附曹縣志披雲樓在左山舊州城宋知州

郭槩建金路鐸有詩又清風閣在縣北舊

州城上鐸詩云坐深忘畏日飲久失餘霞

附續夷堅志孟州路宣叔未二十而娶未

全金詩卷二十五
三
幾妻亡追悼不已鬱鬱不自聊夜夢妻如
平生說身後爲護蘭童子住翡翠菴作詩
記之云翡翠菴前花草香護蘭童子淡雲
妝夙緣還却三生債不道未歸人斷腸未
歸人用死者爲歸人生者爲行人之義

御訂全金詩增補中州集卷二十六

金元好問原本

師拓
一十二首

拓字無忌平涼人舉進士不中明昌中有
司薦其才以嗜酒不果作詩有氣象而工
於鍊句如賦雁云天低仍在眼山沒更傷

心溪上云夕陽明
菡萏秋色靜蒹葭
白曳衝烟鷺紅翻
漾水霞春日池上
云水風涼綺席沙
日麗金壺燕市酒
樓云氣清天曠蕩
露白野蒼涼又荷
蒼秋近葉蓮膩雨
餘花大爲時人所
稱

秋夜吟

阪路太行險波濤
滄海深素縑未偶
時白髮將盈簪壯
士莫年意游子中
夜心撫劍一太息
月暗天

橫參

浩歌行送濟夫之秦行視田園

霜斂野草白氣肅
天宇清開尊酌遠
客餞此秦關行秦
關杳杳愁西顧千
里蒼茫但烟樹子
今行轡按秋風想
見秦關雄勝處河
流洶洶崑崙來蓮
峰秀拔青雲開終
南南走絡巴蜀五
陵北望令人哀我
本渭城客浪迹來
東征窮齊歷宋嗟
何營尚氣慕俠游
梁城信陵白骨委
黃土夷門誰復知
侯生

撫劍一長嘯作歌誰爲聽青天白日空冥冥不能
乘桴入滄海拂衣且欲歸汧涇落魄高陽歸未得
送子西歸空愴情

冬夜二首

雲破月穿牖夜嚴風號隙客子寢不安寒燈照空
壁默然不平事起坐長太息書但記姓名劍本匹
夫敵追奔慕前哲恢張濟時策何意造物兒重此
稻梁役興酣氣益振孤憤遠飄激非無南山雲高

臥養虛寂茹芝酌懸流嘯吟展胸臆聖達豈不念
且有不暖席此抱誰與知乾坤夜寥閬

破屋星斗入疎牖霜風生沈沈夜何久杳杳天不
明燈暗饑鼠出月朗棲鳥驚幽意苦盤礴歷落窮
八紘貧賤豈足戚所思天下英盤木無先容竟與
枯朽并旃毳脛纔掩藜藿腹不盈鬱鬱命世才何
階伸一鳴僵臥蓬蒿底要路誰爲名恥作埽門謁
寧爲醴酒行直將叫閭闔皎皎開寸誠白日下留

照廓廓賢路亨此志恐未必搖蕩熱中情

游同樂園

晴日明華構繁陰蕩綠波蓬丘滄海遠春色上林
多流水時雖逝遷鶯暖自歌可憐歡樂極鉦鼓散
雲和

陪人遊北苑

甲子
歲

繫馬溪邊酌啼鶯柳外聞望長魂欲斷愁豁酒微
醺草色明殘照江聲入暮雲故園春色到歸思日

續紛

曲江秋望

山遠嶂重出野平天四圍涼風芡實坼久雨藕花
肥水濶漁舟小天長去鳥微紫蒲行處有采采莫
盈衣

和王逸賓繁臺詩

憑望憐臺迥長吟苦思荒行雲春郭暗高鳥莫天
蒼草色傷心極松風灑面涼故園兵革外殊覺路

途長

贈雲中劉巨濟

雲廓乾坤迥霜摧草樹殘
風聲秋晚急月色夜深
寒綠綺音誰會青霄氣自干
那知燕市裏把酒得
交歡

郡城南郭早望

曉立回塘上何人逸興同
柳濃天霽雨萍坼岸含
風鳥影明蒼靄湖光倒碧空
秦川何日到解髮濯

清澧

中元後二日

暑謝涼生際庭虛雨過時
天長雲斷續風急樹離
披世態貧逾薄秋光老易悲
燕城寒事早還與舊
貂期

和張叔獻題首善閣

岌巖飛閣與雲齊來凭修欄
日轉西秦客此時愁
欲醉隴山何處望渾迷
九天花鳥催春事千里風

烟入莫題久怕殊方看節物不知今日在丹梯

附金詩紀事案同樂園有二金時汴京燕
京皆有之明一統志云同樂園在開封府
城東北宋徽宗置舊河南志亦云在開封
府堽子門內此園之在汴京者也兩志皆
載有無忌詩又大金國志云西至玉華門
曰同樂園若瑤池蓬瀛柳莊邨盡在於是
此園之在燕京者也而日下舊聞亦以此

詩并趙閒閒同樂園絕句之一系於其後
未詳孰是

酈著作權 一十六首

權字元輿安陽人作詩有筆力圃田道中
云斷橋經壞屋古道入摧山石礪云蒼崖
秀苔花壞道補石棧徐行下井底斗上出
天半綺岫宮云離宮歸相望百年幾遊歷
獨知窮已樂衆懟不汝恤繁花忽灰燼歲
月空瓦礫赤水道中云水近噓寒氣星殘
曳白芒燒痕云炎威隨變滅餘燼委丘壤

田疇更斷續原隰依下上班班澗溪毛往
往漏尋丈晴空墮雪影夕照壓秋嶂昆明
翻刮灰黑水走濁浪烟中一線來細路入
空曠游石甕云雲間兩石角相鬪如闕門
上連石甕口谿衍愁猿猿枵如空洞腹瑩
滑無纖痕何年補天手月斧雲爲斤琢成
蒼玉甌覆此玻璃盆龍潭云臺高野望遠
地僻春意閒郊行云強引村醪終少味漫

留詩句嬾題各村行云瘦藤籬角蔓雜草
樹根花夾道懸新棗荒畦臥晚瓜又云歲
豐人樂社秋近客思家書事云佳樹漲新
綠危叢棲老紅與顯叔云茶竈翻春白糟
牀滴曉紅雜詩云樹影僧攜錫鈴聲客到
門片月冷千嶂敗橋通兩村此類甚多元
輿父瓊國初有功仕至武寧軍節度使元
輿以門資叙宦不達朝廷高其才明昌初

以著作郎召之未幾卒有坡軒集行於世

聞砧

玉關消息到長安處處砧聲搗夜闌想得月殘哀
響斷一燈清淚剪刀寒

夷門遣懷

梁園花木艷精神盡屬東風點綴人雪壓老梅香
不起問君消息幾多春

西游雜詩

茅店雞聲外柴車犬吠間疎星涵積水殘月墮昏
山好夢人何在秋風我獨還梨園有名酒聊此慰
間關

慈恩寺塔

慈恩石刻半公卿時遇聞人爲指名龍虎榜中休
著眼一篇俚賦悟平生

木犀

菊小未堪摘荒池悴芙蓉窮秋不慰眼幽獨將焉

全金詩卷二十六
九
如殷勤葢宮子種桂庭之除乘閒弄餘花散落荒
山隅從茲雲月喬漂泊生江湖娟娟耐凍枝便與
羣芳殊琉璃剪芳葆蛾黃拂仙裾唾袖花點碧漱
金粟生膚好風一披拂九里香縈紆蘭蕙不敢友
荃蓀正僮奴妄意此尤物化工異吹噓不然九天
香安得獨副渠託物寄深蘊古今一三閭收攬名
草木自比君子徒惟茲不挂口無乃聖不居抑夫
古簡編斷決秦火餘君看齊魯臣史筆逸其書惜

哉不可曉臨風爲嗟吁猶憐元祐前不及附歐蘇
末路益可惜例進宣和初仙根豈易致百死不一
甦昔遊汴離宮識此傾城姝摩娑三品石尚想狎
客娛却後十五年微霜半粘鬚一枝再經眼相對
憐羈孤不知苦何事玉骨乃爾癯故人憐我老尺
書遠招呼要趨秋香濃共此碧玉壺遙知嬋娟客
與我一笑俱

竹林寺矮松

全金詩卷二十六
一
蒼烟靄山曲回溪抱修筠中藏古佛宮荒僻無四
鄰靈松插殿脚偃蹇今幾春何年霹靂雨抉石搜
潛鱗謫重飛舉難墮此蜿蜒身聯拳縮爪股氣屈
不得伸臥枝老無力支撐藉樵薪無風自悲吟失
水固不神安知才不才禍福了已分南山聳千嶂
直幹排風雲正以中繩墨中道遭斧斤豈知無用
資千歲保其貞何必求先容養此老困輪我亦愛
奇節歲晏守賤貧他時來汝伴露頂挂葛巾

自鶴壁游善應洹山

清晨發鶴山瘦馬凌峻嶺春風吹雪谷朝霧濕雲
影羊腸抱傾崖絕壑如下井硤關山却立老眼入
絕境人家跨清溪桑柘鬱數頃西行復幾里巖谷
棲短景窮溪水源清溜溜如細綆下流泉滿山勢
合久方騁灘光落鏡明嵐氣排雨冷何年鑿青壁
兩佛入禪定殘僧久零落遺塔寄烟冥荒涼布金
地雜逕樵牧徑同遊成六逸轟飲助高興留連更

坐臥談笑發嘲咏感物復歎嗟醉語忽逕廷青山
不愛寶歲歲出磬礦公場沸千夫利井供百鼎誰
開爭奪源敗此丘壑勝頗思呼有力擲入萬里迥
天神定笑我癡絕謾生瘦長懷古畸人飛夢遶箕
穎

八渡崖

奔湍百折似蟠虬響入山根匯復流咫尺蒼崖溪
八渡等閒藜杖我頻遊層崖障日樵聲晚寒谷呼

風樹影秋安得剩栽溪上竹一庵領盡兩山幽

留仲澤

朝初酒濕紫宸霞暫輟旌旗擁使華馳馬彎弓真
將種載書囊筆自名家江湖萬里春回鴈燕趙千
林月滿花明日升沈便霄壤更留玉樹倚蒹葭

寄唐州幕官劉無黨

白髮青山宦苦卑邊荒誰識鳳麟姿河西落魄高
書記劍外清貧杜拾遺紫玉山高傳楚夢蠙珠淵

靜照黃陂禁中頗牧他年事先遣江南草木知

除夜

殊方節物老堪驚病怯諸隣爆竹聲梨栗異時鄉
國夢琴書此夕故人情眼看曆日悲存歿淚濺屠
蘇憶弟兄白髮明朝四十七又隨春草一番生

七夕

縹緲針樓外天教彩羽過步雲榆送影拂月桂交
柯繡縷縈芳袂瓜蓮得巧梭姮娥如解妒還與試

斜河

濟源廟海子內有二黿人以將軍目之投餅
餌則至

我欲燃犀起蟄雷謾誇海蘸紙錢灰將軍不是池
中物也爲區區餅餌來

裴公亭

十里蓮塘際碧山入潭無數竹根泉詩狂欲灑亭
間壁却媿文公與樂天

郊行二首

十里修篁翠拂天青田漠漠水濺濺高林忽斷驚
回首不覺奇峰墮眼前

溪橋納納馬蹄輕竹裏人家犬吠聲行盡灘光溪
路黑隔林燈火夜深明

史御史肅 三十首

肅字舜元京兆人僑居北京之和衆幼孤
養於外家天資挺特高才博學作詩精緻
有理尤善用事古賦亦奇峭工於字畫業
科舉爲名進士立朝爲才大夫優於政事
嚴而不苟所至有聲吏畏而安之累以廉
陞歷赤縣及幕官入爲監察御史遷治書
出刺通州大中黨獄起爲所註誤謫靜難

軍節度副使大安初召爲中都路轉運副
使超戶部正郎復坐鑄降同知汾州事卒
官舜元素尚理性之學屏山學佛自舜元
發之晚年頗喜養生謂人可以不死嘗欲
棄官學道而竟止於此可哀也已詩號澹
軒遺藁今在燕都鄭庭幹家其平生則見
之屏山故人外傳云

偶讀賈逵之邀飯帖有感作詩哭之

微官已歎鸞棲屈異事俄傳鵬告凶彩筆書來墨
痕濕玉樓人去酒尊空當時快意牛心炙今日傷
懷馬鬣封一幅銘旌送哀挽白楊蕭索九原風

河上

堤外三竿日河邊八尺泥夜風喧馬櫪秋露冷雞
棲歲月吾生老關山客夢迷故園桃李樹搖蕩不
成蹊

別張信夫

全金言卷二十六
五
破壘殘星沒寒城曉角孤天低雲錯莫野曠雪糝
糊小市千錢米征人丈八及邊愁故未已不敢恨
長途

別懷玉

官曹不着市門仙綠髮忽忽換少年慣作簿書塵
裏夢愧無山水窟中綠蜂腰鶴膝曾搜句兔角龜
毛不論禪此別相思渺何許一川山色鴈連天

山陰縣

湧雲驅雨不成霖山徑危行未要深午夢初迴鳥
鳥樂小亭斜日柳陰陰

方丈坐中

紙本功名直幾錢何如副與北窓眠詩書作我閒
中地風月知人醉裏天水底游魚真見性樹頭語
鳥小叅禪平生習氣蓮華社一炷香前結後緣

早出遵化

朝來對酒不能觴看盡西風去鳥行山好未忘三

日雅詩窮贏得一秋忙強顏紅葉自由舞野性黃
花無賴香多謝殷勤莫雲影更留淡墨寫溪光

宿睦村

闌干河漢已西傾獨坐披衣過五更簷馬丁東風
外響田車歷轆月中行忘形沙鳥知人意宰地山
雲不世情露草霜筠有幽意詩題分付候蟲聲

次韻安之飲酒

日上南窓已數竿醉頭扶起不巾冠欲開社甕多
招客先乞兵厨暫補官玩世惟知酒功聖藏身無
似醉鄉寬麒麟閣上功名字不博生前一笑歡

過九里山

斷蛇扛鼎兩爭雄陳迹荒涼萬事空今日山前無
過客數株衰柳管秋風

道傍柳

秋霜一何嚴凋此道傍柳殘枝幾葉在其勢不得
久憶昨三春時濯洗烟雨後弄姿舞婆娑勸我一

金言卷二十六
七
盃酒別後遽能幾忽忽成老醜人生非金石長短
百年壽功名與富貴於身亦何有古人隨物化今
已柳生肘我獨何爲哉窮年事奔走長堤隱落月
駐馬一迴首春風柳稍黃定得西歸否

登憫忠寺閣

淨宇懷超想層梯企俊游喧卑三界盡製作六丁
愁聚土閒童子移山老比丘能除分外見寸木卽
岑樓

讀傳燈錄

閉戶懶不出真成任夏僧肝腸雖自苦面目得人
憎處世若大夢學禪猶小乘早知文字悞更用讀
傳燈

夏夜

一雨昭蘇外羣山宴寂中移牀就佳月引袂納涼
風蝸舍憐渠小蚊雷訝許同幽懷闕清境舒嘯夜
將終

物化

物化能忘我天游不用心
羶香羣蟻聚樹靜一蟬吟
敗井勞深汲荒庭闕近尋
枕書聊假息夕日半墻陰

立秋日

舊穀催新穀今秋似去秋
年衰猶健飯官達也窮愁
樹鳥依依宿簷螢細細流
箇中詩句在倚杖得冥搜

感興

避俗嫌高絕干榮恥盜誇
居貧偶從仕學道不忘家
樹果蕃秋實園葵粲晚花
一軒吾事了無意竟紛華

偶書

東風數點梨花雪吹我傷春
萬里心知有高亭堪眺遠
惜無佳客共登臨晴雲入
戶團傾蓋飛鳥隨人作好
音寒食清明少天色孤居未
要酒杯深

放言二首

蓮社從來說陶遠竹林今不數山王家雞野鶩何
須較秋菊春蘭各自芳

清風明月無人管茶鼎薰爐與客同壯歲羞爲襍
穢子而今却羨嘒嘒翁

曉出東廬

谷口子真隱水濱韋氏莊鷗鷺賓客對鴻鴈弟兄
行小圃藜生竹平林半是桑朝陽生野渡濕盡馬

蹄霜

次張信夫韻

絳帳先生寄一州不教文字到橫流草玄只擬關
門坐好事應從載酒游虎穴已曾探虎子龍溝未
信出龍頭錦囊詩句年來滿供盡閒花野草愁

髮脫

年年道路少清歡處處葵蔬餽薄冷月色過窓同
夜夢霜華著壁獨朝寒求醫未有詩千首破老惟

消竹數竿衰髮從今不須脫少留衰白戴黃冠

立秋日

畏景流庭過涼颺卽坐來物隨時共換人覺老相
催憇蝶依藜穩嘶蟬抱樹哀玉簪香好在墻角幾
枝開

復齋

居士年來一復齋馴庭鳥雀絕驚猜雨添窓下硯
池滿風揭牀頭書卷開身似臥輪無伎倆心如明

鏡不塵埃紛紛寵辱人間世副與浮雲任去來

北潭

竹陰松影玉葱籠十里平堤一徑通碧水乍開新
鏡面青山都是好屏風寒蟬高鳥清愁外折葦枯
荷小景中酒力未多秋興逸夕陽聊貸半林紅

晚興

秋蟲已息又還吟晚雨初晴又作陰水面微風掠
蒼玉雲頭落日綠黃金年豐酒價應須賤睡起茶

金言卷二十六
三
甌未要深人道雙清到心迹年來無迹亦無心

雜詩二首

春江日暖舞清漣客舍蕭蕭一縷烟幽鳥隔林招
我醉小桃當戶爲誰妍禪心已作沾泥絮詩思渾
如上水船却是官閒得無事一簾紅雨枕書眠
南皮城下荒秋草說是當日燕支臺世事翻騰只
如此吾生棄置已焉哉迎風紫萸因循老背日黃
花次第開獨夜不眠思阿謝白羊如駕小車來

御訂全金詩增補中州集卷二十七

金元好問原本

史內翰公奕 一首

公奕字季宏大名人系出石晉鄭王弘肇
父良臣宣和中擢第終於潞州觀察副使
季宏大定二十八年進士再中博學宏詞

全金詩卷二十一
科程文極典雅遂無繼之者累遷著作郎翰林修撰同知集賢院正大中置益政院楊吏部之美與季宏皆其選也以直學士致仕年七十三卒季宏文章書翰皆有前輩風調下至碁槩之技亦絕人遠甚閒閒稱其溫厚謙退與人交愈久而愈不厭其學問愈扣而愈無窮其見重如此詩文號洹水集兵後失之子應祖字企先孫彥忠

今在燕中

補歸潛志史翰林公奕字宏父大名人工書有能名自號歲寒堂主人正大初爲翰林修撰又充益政院官後致仕居亳卒重厚人也

李鴈門

天下三分二屬梁區區獨木欲支唐錦囊三矢傳遺恨不救朱三着赭黃

附明宋濂題史內翰書右歸去來辭一卷
大名史公奕興定五年所書以贈李澥者
也公奕字季宏大定二十八年進士再中
博學宏辭科累遷著作郎翰林修撰同知
集賢院後以直學士致仕文章書翰皆有
故老遺風所著洹水集尚傳於世澥字公
渡湘人也少學詩於王內翰子端亦工行
書不失前輩典刑累舉不第而卒自黨文

獻世傑趙郎中文孺任判官君謨趙尚書
周臣諸公先後疊起風聲氣習濡染爲深
故金之士大夫多以善書名家觀季宏公
渡則其餘盡可見矣季宏性雖溫厚每靳
與人書今特爲公渡贈者豈非同聲相應
者乎宣宗自改元興定之後國政愈非而
疆土日蹙古人之文何限季宏之不書而
獨拳拳於是書者意其先見亡兆而殆將

隱歟距作此紙時僅十年而金社遂屋矣
吾黨閱此卷者又當於此求之

蕭尚書貢

三十二首

貢字真卿咸陽人唐太傅寘十七代孫博
學能文不減前輩蔡正甫大定二十二年
進士自涇州觀察判官召補省掾不四五
月拜監察御史累遷右司郎中預修泰和
律令所上條畫皆委曲當上心興陵嘉歎
曰漢有蕭相國我有蕭貢刑獄吾不憂矣
又奏死囚獄雖已具仍責家人伏辨以申

金言卷二十一
四
寃抑詔從之遷刑部侍郎入謝曰臣願因
是官廣陛下好生之德上大悅凡真卿所
平反多從之歷大興同尹德州防禦使同
知大名府事陝西西路轉運使河東北路
按察轉運使靜難軍節度事南京都轉運
使御史中丞以戶部尚書致仕年六十六
終於家諡曰文簡有注史記百卷公論三
十卷五聲姓譜五卷文集十卷傳於世

渭南縣齋秋雨

穴牀撐拄小窓前一點青燈照不眠
簷溜琮琤風淅瀝嫩涼如水夜如年

假梅

綠窓嬌小似梅人素手東風巧思新
鸞尾剪裁千顆雪蜂脾點綴一家春
長教客枕生幽思不逐林花委路塵
莫道去非詩破的兔毫那解寫花真

臨泉道中

半世事行役茲游初未經峽門逃白晝嶺脊上青
冥澗曲莓苔滑松盤霧雨溟登危人跼踏涉險馬
矜墀落日留行客投鞭得驛亭短墻明積雪破屋
漏疎星羌笛誰三弄羈懷強一聽葭蘆知不遠河
外數峰青

自感

形骸副與甄陶外禍福難防倚伏前孔雀若知牛
有角應須忍渴過寒泉

荒田擬白樂天

荒田幾歲闕人耕欲種糜蕎趁晚晴急手剪除荆
與棘一科才了十科生

樂府崔生

徽蘭二
崔名

徽門晝暖柳啼鴉蘭閣春深月照紗腰素輕盈珠
袂穩鬢雲鬆亂玉釵斜春風一去空陳迹莫雨三
生只當家自倚廣平腸似石不妨綺語賦梅花

米元章大字卷

顏楊死去誰補處米狂筆力未可涯追摹古人得

高趣別出新意成一家老蛟駮雲肉倔強枯樹漬

雪冰楂牙九原裴說如可作應有新詩三嘆嗟裴說

懷素草書歌欲歸家三嘆嗟眼前
三箇字枯樹楂烏梢蛇黑老鴉

楊侯畫晉公臨江賞梅樂天與鳥窠禪師汎

舟談玄不顧而去戲為一絕以代晉公招樂

天同飲云

明粧冷蓋兩清新面纈浮光數爵頻
技拭風前寒

鼻液快來同醉雪中春

漢歌

華陰雙壁傳山鬼報道明年祖龍死草間豪傑伺

天時攘袖撫衿爭欲起藜祠篝火妖狐語夥涉為

王張大楚南公舊有三戶謠東井新看五星聚中

原茫茫走秦鹿天遣沛公興白屋大蛇斬斷素靈

號虫尤祭罷朱旗蠹竭來扶義入關中恩結人心

帝道隆秦法煩苛猶一洗項王慄悍何勞攻三傑

相須立人紀四老仍來安太子已令陸賈說詩書
更詔孫通制儀禮阿翁着手規摹遠獨恨兒孫讀
城旦王純霸雜寧不知不是不知知已晚

楚歌

沙丘車過亡明鏡人頭畜鳴自賢聖阿房殿裏醉
宮娃趙高手持國柄羣雄雲擾蕩山東邯鄲却
墮秦圍中項王一戰動天地諸侯膝行趨下風割
裂河山建侯國天下畏威心不服只貪衣繡榮楚

猴豈識金刀得秦鹿楚歌一夜四面發泣別虞姬
歌數闕殘兵牢落似晨星獨騎凌兢踏寒月烏江
渡口方喚船五侯追奔已江邊苦道天亡非戰罪
劍化壯氣成飛煙君王雄武古無比獨無仁義誰
相濟向能忠計資范增未必漢家能卜世穀城東
頭土一坵悠悠遺恨何年休

悲長平

秦兵伏甲武安西趙將非材戰士攜千里陣雲沉

曉日萬家屋瓦震秋輦哀纏朽骨天應泣怨入空
山鳥不棲百戰區區竟何得阿房烟草亦淒迷

雒陽

西來洛水遶崧高野店荒村換市朝董卓搜牢連
數月郭威夯市又三朝劫灰深掘終難盡鬼火爭
然忽自消千古興亡幾春夢只將閒話副漁樵

中秋對月

去年中秋客神京露坐舉杯邀月明今年還對去

年月北風黃草遼西城年年月色長清好只有悲
秋人易老兒童不解憶長安歌舞團圞遶翁媪人
生宦游真可憐不知何處度明年預愁老罷廢詩
酒負此冰玉秋嬋娟我生萬事隨緣耳居自無憂
行亦喜君不見杜子閨中只獨看鄜州寂寞千山
裏

寄答張維中

北轅千里赴陪都日覺還家計愈疎人事浮雲千

變化宦途平地幾崎嶇青山有約長回首白髮無
情忽滿梳賴有同年老兄弟相思時寄數行書

保德州天橋

鬱鬱風雲入壯懷天潢飛下碧崔嵬兩崖偏側無
十^音步萬頃逡巡納一盃濺沫紛紛跳亂電怒濤
殷殷轉晴雷曾聞電火魚燒尾會趁桃花漲水來

靈石縣

古道行人少荒城亂石侵天橫機素直河入土囊

深澗近雲長潤山高日易沈田翁樂豐歲歌笑下
崎嶇

真容院

魔宮佛界等空虛此理何曾屬有無直向臺山始
相見可中還有二文殊

讀火山瑩禪師詩卷

禪師隴州白氏岐山令
君舉樞判文舉之弟自

幼日有詩名河東嘗有詩云十日柴門九
不開松庭雨後滿蒼苔草屨挂起跣趺坐
消得文殊更一來歸寂後
客有示其集者因題其上

長短都歸一夢中
身前身後雨無窮
李愷信士今如在
定向江湖訪澤公

君馬白

我馬瘦君馬肥
我馬虺隤君馬飛
彫鞍寶校錦障泥
向風振迅長鳴嘶
一朝計落路傍兒
銅鬲爲榔薪爲衣
瘦馬雖瘦骨骼奇
古人相馬遺毛皮
千金一顧會有期

陳宮詞

三閣花深白晝迷
酒催狎客賦宮詞
管絃散落春風外
一曲金釵兩鬢垂

岢嵐

岢嵐地勢橫三汭
河朔城墉挂一箕
紫塞高連寒日短
黃榆落盡長年悲

按部道中二首

窟野河津水沒腰
管岑官路雪封條
一年樂事能多少
強半光陰馬上消

金鑑詩卷二十一
寒城睥睨插山隅，秋半霜風塞草枯。
月轉譙樓天未曉，角聲吹徹小單于。

日觀峰

半夜東風攪鄧林，三山銀闕杳沈沈。
洪波萬里兼天湧，一點金烏出海心。

族兄才卿一第後赴宜祿酒官以詩寄之

久期老距擅文場，命壓人頭可得忙。
兩腳塵泥官業晚，十年燈火夜窗涼。
霜添老葉山梨紫，雨浥寒

花野菊香

寒花一
作寒叢

南北相望無百里，幾時尊酒澆

離腸

梨花

丰姿閒淡洗粧慵，眉綠輕顰秀韻重。
香惹夢魂雲漠漠，光搖溪館月溶溶。
陳家樂府歌瓊樹，妃子春愁慘玉容。
安得能詩韓吏部，郭西同去醉千鍾。

後趙

擬倫人物指高光，可笑臯雛不自量。
正使成名皆

全金詩卷二十一
豎子英雄也未到君行

古採蓮曲

洋洋長江水渺渺漲平湖田田青荇荷艷艷紅芙
蕖酣酣斜日外萼萼涼風餘蓓蓓誰家子裊裊二
八初兩兩並輕舟笑笑相招呼悠悠波上鴛潑潑
蒲中魚采采不盈手依依欲何如

擬迴文四首

春波綠處歸鴻過夜月明時飛鵲愁人去附書將

恨寄莫山雲斷倚高樓

樓上却來樓下待晚窓春盡斷回腸愁人有說嫌
人問淚灑新詩埽墨香

風幌半縈香篆細碧窓斜影月籠紗紅燈夜對愁
魂夢老盡春庭滿樹花

萋萋碧草連天遠杳杳行人幾日迴淒雨晚涼空
坐久淚粧殘暈濕紅腮

龐都運鑄 二十首

鑄字才卿大興人家世貴顯明昌五年進士風流文采爲時輩所推字畫亦有蘊藉仕至京兆運使自號默翁

補歸潛志龐戶部鑄字才卿遼東人少擢第仕有能名南渡爲翰林待制遷戶部侍郎坐游貴戚家出倅東平擢京兆路轉運使卒博學能文工詩書藹然爲一時名士

雪谷曉裝圖

溪流咽咽山昏昏前山後山同一雲天公談笑玉
雪噴散爲花蓋白紛紛詩翁瘦馬之何許忍凍吟
詩太清古老奴寒縮私自語作奴莫比詩奴苦木
僵石老鳥不飛山路益深詩益奇老奴忍笑憐翁
癡不知嗜好乃爾爲楊侯胸中富丘壑醉裏筆端
驅雪落因何不把此詩翁畫向草堂深處着

景骨城驛中夜雨

畫角邊城莫孤春野水秋一川霜樹老萬葉雨聲
愁自古誰青眼勞生只白頭何時問漁父容我一
扁舟

洛陽懷古

草樹蕭條故苑荒山川慘淡客冤傷玉光照夜新
開塚劍氣沈沙古戰場金谷更誰誇富麗銅駝無
處問興亡一尊且對春風飲萬事從來穀與臧

田器之燕子圖 器之自叙云明昌丙辰予

從軍塞外合魯里山野舍荒涼難以狀言春
未有雙燕亦巢此屋土人不之識屢欲捕之
予曲爲全護此燕晝出夜歸予必開戶待之
忽一日飛止坐隅都無驚畏巧語移時不去
予始悟明日秋社此鳥當歸殆留別語也因
作一詩贈之云幾年塞外歷崎危誰謂烏衣
亦此飛朝向蘆陂知有爲莫投茅舍重相依
君憐我處頻迎語我憶君時不掩屏明日西

風悲鼓角君應先去我何歸此詩以細字寫
之爲蠟丸繫之燕足上明年四月予受代歸
又八年泰和甲子任潞州觀察判官四月十
二日偶坐解舍之舍翠堂忽雙燕至一飛簷
戶間一上硯屏予諦視之繫足蠟丸故在乃
知此鳥蓋往年贈詩者也因請同年龐君才
卿畫爲圖求諸公賦詩

器之姓田名琢雲朔人明昌五年進士仕

至山東路宣撫使慷慨有志節閒
閒公所謂田侯落落奇男子者也

田君才畧燕雲客少年累有安邊策悔從筆硯取
功名直要橫馳沙漠北塞垣春雪白皚皚東風未
放玄陰開烏衣之國定何許一雙燕子能飛來三
年驛舍安西道眼底鶯花無夢到忽見低飛入短
簷此身似向邯鄲覺君居海東我中原相逢乃在
穹廬前天涯流落俱爲客感時念遠空潛然長安
何限高高閣晝夜風閒開翠幕底事猜嫌不往依
甘從此地風沙惡土人嗜肉無仁心一生弋獵誇

從禽有巢幸穩勿浪出汝身未必輕千金朝來莫
去益狎昵物我相忘情意一但怪重裘積漸添元
是西風催社日須知音巧惟鷓鴣忽來坐隅如告
辭我方留寓未歸得爲君忍賦傷心詩詩成自述
聊爲戲繫足封之亦無意燕已歸飛我未歸刁斗
聲中忽驚歲旄頭夜落妖氣收嫖姚獻凱歸神州
玉關早喜班超入北海不聞蘇武留君才經世寧
終在幕府須賢來上黨別後歸期兩及瓜人間秋

燕十來往沈沈官舍紅芳稀葛衣燕居澹忘機忽
聞巧語入簷戶大似相識來相依一飛簷外窺庭
樹一上屏山驚不去解足分明得帛書真是當年
留別句天生萬物禽最微固耶偶耶吾不知古道
益遠交情醜朝思莫怨雲遷移當時握手悲別離
一旦富貴棄如遺聞予燕歌應自疑慎無示之嗔
我譏楊之美尚書詩云危巢客舍久相依常記西
風社日歸海國傳心千驛隔塞垣回首十年
非新詩尚在人空老舊夢無憑鳥自飛寄語齊諧
休志怪沙鷗相欵解忘機張巨濟云沙塞相逢命

已輕翠堂重見眼增明小詩繫足初無意巧語迎
人獨有情陰德自招黃雀報機心能致白鷗盟社
前秋後風光好須賀他年大厦成李之純云一別
天涯十見春重來白髮一番新心知話盡春愁處
相對依依如故人王大用云相別相尋積歲年人
心不及鳥心堅莫償恩義三生債分付平安七字
篇王謝烏兜疑誕說紹蘭紅線定虛傳何如此段
人親見舊話從今不直錢李欽叔云塞上光風已
十霜仁心覆護獨難忘當時相送詩仍在此日重
來話更長客舍花開新信息雲兜香冷舊昏黃王
人得報君知否千古珠璣在錦囊閒趙公三詩
田思敬敬之刁白晉卿趙永元王副樞子明詳節
張雲卿師緒各
一詩此不具錄

晚秋登城樓二首

山勢碧環合溪光縞帶明牛羊成晚景砧杵助秋聲酒薄人情廢官閒吏事生天東歸興滿不爲憶
萼羹

落日危樓上詩成只自哦清商行老矣紅葉奈秋何墮甌前非悟跳丸去日多功名猶誑我未許著
漁蓑

冬夜直宿省中

吏散庭空宿鳥過凍吟聊復戰詩魔陶泓面冷真堪唾毛穎頭尖漫費呵畏事政宜賓客少不才偏覺簿書多西窓燈闇尊無酒奈此迢迢夜漏何

山行絕句

四面雲山玉作圍一川霜樹錦爲衣翩翩數騎南岡下傅粉王孫射鹿歸

漉酒圖

我愛陶淵明愛酒不愛官彈琴但寓意把酒聊開顏自得酒中趣豈問頭上冠誰作漉酒圖清風起

金言卷二十一
毫端露電出形似神情想高閒大似揮絃時目送
飛鴻難袖中有東籬開卷見南山嗟予困塵土青
鬢時一斑折腰尚未免敢謂善閉關望望孤雲翔
羨羨飛鳥還歸田未有日掩卷空長歎

夏日

富國才疎合自羞清時無補但優游只知錢向紙
中裹不信能教地下流

花下

香滿西園曉雨微萬紅千翠自高低若爲常作莊
周夢飛向幽芳鬧處棲

梨花

孤潔本無匹誰令先衆芳花能紅處白月共冷時
香縞袂清無染冰姿淡不粧夜來清露底萬顆玉
毫光

未開牡丹

國香半吐醉顏酡炫耀春光已自多愛惜不教催

金言卷二十一
三
羯鼓更澆卯酒看如何

却暑

九夏樓居不厭高更須直至冷雲巢風來蘋末聊
自快暑滿人間無處逃蔗蜜漿寒冰皎皎畫簾鈎
冷月梢梢閒思殿角生涼句誰爲懸誠作解嘲

懷友

鏡裏衰顏失舊紅當年豪逸夢魂中山城對月中
秋夜隴鴈寄書西北風遣興與誰同酒盞相思無

處附詩筒憑高想到消魂處落日無言水自東

喜夏

小暑不足畏深居如退藏青奴初薦枕黃妳亦升
堂鳥語竹陰密雨聲荷葉香晚涼無一事步履到
西廂

墨竹三首

隔溪烟雨

一溪流水玉涓涓溪上修篁接暮烟誰倩能詩文
與可筆端移得小江天

又 秋風驟雨

瀾川急雨暗秋空無限琅玕澹墨中劍甲縱軍
十萬欲將貔虎戰斜風

又 春雷起蟄

千梢萬葉玉玲瓏枯槁叢邊綠轉濃待得春雷驚
蟄起此中應有葛陂龍

山谷透絹帖

君不見李廣射虎如射兔霹靂一聲石飲羽又不

見巨靈擘山如擘雲蓮華萬仞留掌痕精神入物
物乃爾筆端有神亦如此熙豐以來推善書日下
無雙黃太史胸中八法蟠虹霓峨眉仙人容並馳
平生敗筆塚纍纍妙處不減磨崖碑呂侯好古兼
好異與字分身作遊戲清潭錯落印星璧大澤縱
橫散龍蛻又如漢宮粉黛爭嬋娟倚風顧影影更
研豈無硬黃官紙與臨倣畫師寫照非天然呂侯
之子今詩仙傳家以此爲青氈須防神物有時合

却逐六丁飛上天

附畫史會要龐鑄善山水禽魚

金言卷二十七

三

